

王湘綺先生全集

梁第一

八代詩選十一上

五言第九

長沙湘潭王闔運撰

武帝蕭衍

芳樹

綠樹始搖芳
芳生非一葉
葉葉度春風
芳芳自相接
雜色亂參差
眾花紛重疊
重疊不可思
思此誰能愜
有所思

誰言生離久
適意與君別
衣上芳猶在
握裏書未滅
腰間雙綺帶
夢爲同心結
常恐所思露
瑤華未忍折
臨高臺

高臺半行雲望望高不極草樹無參差山河同一色髣髴
洛陽道遠難別識玉階故情人情來共相憶

雍臺

日落登雍臺佳人殊未來綺窗蓮花掩網戶琉璃開葦茸
臨紫桂蔓延交青苔月沒光陰盡望子獨悠哉

擬青青河邊草

幕幕繡戶絲悠悠懷昔期昔期久不歸鄉國曠音徽音徽
空結遲半寢覺如至旣寤了無形與君隔平生月以雲掩
光葉以霜催老當途竟自容莫肯爲妾道

擬明月照高樓

圓魄當虛闌清光流思延延思對孤影悽怨還自憐臺鏡
早生塵匣琴又無絃悲慕屢傷節離憂亟華年君如東扶
影妾似西柳煙相去路旣迴明晦亦殊縣願爲銅鐵轡以
感長樂前

直石頭

率土皆王土安知全高尙東壠棄黍稷西游入卿相屬逢
利建始投分參末將尺寸功未施河山賞已諒攝官因時
暇曳裾聊起望鬱盤地勢遠參差百雉壯翠壁絳霄際丹
樓青霞上夕池出濠渚朝雲生壘嶂籠鳥易爲恩屠羊無
飾讓泰階端且平海水本無浪小臣何日歸頓轡從閒放

答任殿中宗記室王中書別

問我去何節光風正悠悠蘭華時未宴舉袂徒離憂緩客
承別酒鳴琴和好仇清霄一已曙藐爾泛長洲眷言無歇
緒深情附還流

天安寺蔬圃堂

乘和蕩猶豫此焉聊止息連山去無限長洲望不極參差
照光彩左右皆春色曖曖矚游絲出沒看飛翼其樂信難
忘翛然甯有飾

游仙

水華究靈奧陽精測神祕具聞上仙訣留丹未肯餌潛名

游柱史隱迹居郎位委曲鳳池日分明柏寢事蕭史暫徘徊
待我升龍轡

游鍾山大愛敬寺

曰予受塵縛未得留蓋纏三有同永夜六道等長眠才性
乏方便智力非善權生住無停相刹那卽徂遷歎逝比悠
稔交臂乃奢年從流旣難反弱喪謂不然二苦常追隨三
毒自燒然貪癡養憂畏熱惱坐焦煎道心理歸終信首故
宜先駕言追善友回輿尋勝緣面勢周大地縈帶極長川
稜層疊嶂遠迤邐隘道懸朝日照花林光風起香山飛鳥
發差池出雲去連緜落英分綺色墜露散珠圓當道蘭葳

靡臨堦竹便娟幽谷響嚶嚶石瀨鳴濺濺蘿短未中攬葛
嫩不任牽攀緣傍玉澗褰陟度金泉長塗引翠微香樓間
紫煙慧居超七淨梵住踰八禪始得展身敬方乃遂心虔
菩提聖種子十力良福田正趣果上果歸依天中天一道
長死生有無離二邊何待空同右豈羨汾陽前以我初覺
意貽爾後來賢

代蘇屬國婦

良人如可期不謂當過時秋風忽送節白露凝前基愴愴
獨涼枕悵悵孤月帷忽聽西北雁似從東海湄果銜萬里
書中有生離詞惟言長別矣不復道相思胡羊久剽奪漢

節故支持帛上看未終臉下淚如絲空懷之死誓遠勞同
穴詩

古意二首

飛鳥起離離驚散忽差池噉嘈繞樹上翩翩集寒枝既悲
征役久偏傷壠上兒寄言閨中妾此心詎能知不見松蘿
上葉落根不移

當春有一草綠花復垂枝云是忘憂物生在北堂陞飛飛
雙蛺蝶低低兩差池差池低復起此芳性不移飛蝶雙復
隻此心人莫知

擣衣

八竹詩選 梁一
駕言易水北送別河之陽沈思慘行鑣結夢在空牀
既寤丹綠謬始知紈素傷中州木葉下邊城應早霜
陰蟲日慘裂庭草復芸黃金風徂清夜明月懸洞房
嫋嫋同宮女助我理衣裳參差夕杵引哀怨秋砧
揚輕羅飛玉腕弱袖低紅妝朱顏日已興盼睇色
增光擣以一匪石文成雙鴛鴦制握斷金刀薰用
如蘭芳佳期久不歸持此寄寒鄉妾身誰與容思
君苦人腸

織婦

送別出南軒離思沈幽室調梭輟寒夜鳴機罷秋
日良人在萬里誰與共成匹願得一回光照此憂
與疾君情儻未

忘妾心長自畢

七夕

白露月下團秋風枝上鮮
瑤臺含碧霧羅幕生紫煙
妙會非綺節佳期乃涼年
玉壺承夜急蘭膏依曉煎
昔悲漢難越今傷河易旋
怨咽雙念斷悽悼兩情懸

紫蘭始萌

種蘭玉臺下氣煖蘭始萌
芬芳與時發婉轉迎節生
獨使金翠嬌偏動紅綺情
二游何足懷一顧非傾城
羞將苓芝侶豈畏鴟鳩鳴

詠燭

八什詩選 梁一
五
堂中綺羅人席上歌舞兒待我光泛濫爲君照參差

昭明太子統

飲馬長城窟行

亭亭山上柏悠悠遠行客行客行路遙故鄉日迢迢迢迢
不可見長望涕如霰如霰獨留連長路邈緜緜胡馬愛北
風越燕見日喜蘊此望鄉情沈憂不能止有朋西南來投
我用木李并有一書札行止風雲起扣封披書札書札竟
何有前言節所愛後言離別久

長相思

相思無終極長夜起歎息徒見貌嬋娟甯知心有憶寸心

無所因願附歸飛翼

開善寺法會

棲鳥猶未翔命駕出山莊
詰屈登馬嶺回互入羊腸
稍看原藹藹漸見岫蒼蒼
落星埋遠樹新霧起朝陽
陰池宿早雁寒風催夜霜
茲地信閒寂清曠惟道場
玉樹琉璃水羽帳鬱金牀
紫柱珊瑚地神幢明月璫
牽蘿下石磴攀桂陟松梁
澗斜日欲隱煙生樓半藏
千祀終何邁百代歸我皇
神功照不極睿鏡湛無方
法輪明暗室慧海渡慈航
塵根久未洗希霑垂露光

鍾山解講

清宵出望園詰晨屆鍾嶺輪動文學移笳鳴賓從靜瞰出
巖隱光月落林餘影糾紛八桂密陂陔再城永伊予愛邱
壑登高至節景迢遞覩千室迤邐觀萬頃卽事已如斯重
茲游勝境精理旣已詳元言亦兼逞方知蕙帶人囂虛成
易屏眺瞻情未終龍鏡忽游騁非曰樂逸游意欲識箕穎
講席將訖賦三十韻詩依次用

法苑稱嘉柰慈園羨修竹靈覺相招影神仙共棲宿惠義
比瑤瓊薰染等蘭菊理玄方十算功深似九築華水警銀
舟方衢列金軸微言絕已久煩勞多累蓄因茲闡慧雲欲
使心塵伏八水潤焦芽三明啟羣目寶鐸旦參差名香晚

芬郁暫捨六龍駕微祛二鼠蹙意樹發空花心蓮吐輕馥
喻斯滄海變譬彼菴羅熟妙智方縟錦深詞同霧縠善學
同梵爪真言異銅腹透迥合益城葳蕤布金郁珠華蔭入
溪玉流通九谷青禽乍下上雲雁飛翻覆高談屬時聽寡
聞終自恣日麗鴛鴦瓦風度踟躕屋落騰散遠香霏雲卷
遙族曠濟同象園中乘如佇獨後燄難堅明初心易驚縮
應當離花水無令乖漆木投巖不足貴棘林安可宿器月
希留影心灰庶方撲視愛同采蜂游善如原菽入邑仙人
山四寶神龍澳藥樹永繇稠禪枝詎凋槭以茲悅聞道庶
此優馳逐願追露寶車脫屣親推轂

簡文帝綱

采桑

春色映宮來先發院邊梅細萍重疊長新花歷亂開連珂
往淇上接幃至叢臺叢臺可憐妾當窗望飛蝶忌跌行衫
領熨斗成裙襪下牀著珠珮捉鏡安花鑷薄晚畏蠶飢竟
採春桑葉寄語採桑伴訝今春日短枝高攀不及葉細籠
難滿年年將使君歷亂遣相聞欲知琴裏意還贈錦中文
何當照梁日還作入山雲重門皆已閉方知留客袂可憐
黃金絡複以青絲繫必也爲人時誰令畏夫婿

棗下何纂纂

垂花臨碧澗結翠依丹巘非直入游宮兼期植靈苑落日
芳春暮游人歌吹晚弱刺引羅衣朱實凌還幘且歡洛浦
詞無羨安期遠

怨詩

秋風與白團本自不相安新人及故愛意氣豈能寬黃金
肘後鈴白玉案前盤誰堪空對此還成無歲寒

龍邱引

龍邱一回首楚路蒼無極水照弄珠影雲吐陽臺色浦狹
村煙度洲長歸鳥息游蕩逐春心空憐無羽翼

半路溪

相逢半路溪隔溪猶不度望望判知是翩翩識行步摘贈
蘭澤芳欲表同心句先將動舊情恐君疑妾妒

登城

日影半東簷靖念空杼柚小堂倦縹書華池厭修竹寂寞
既寡悰登城望原陸遙山半吐雲巖飈時響谷靡靡見虛
煙森森視寒木落霞乍續斷晚浪時迴復遠矚既濡翰徒
自勞心目短歌雖可裁緣情非霧縠

戲作謝惠連體十三韻

雜蕊映南庭庭中光景媚可憐枝上花早得春風意春風
復有情拂幔且開楹開楹盈碧煙拂幔復垂蓮偏使紅花

散飄揚落眼前眼前多無況參差鬱相望珠繩翡翠帷綺
幕芙蓉帳香煙出窗裏落日斜階上日影去遲遲節華咸
在茲桃花紅若點柳葉亂如絲絲條轉暮光影落暮陰長
春燕雙雙舞春心處處揚酒滿心聊足萱枝愁不忘

沈約

日出東南隅行

朝日出邯鄲照我叢臺端中有傾城豔願景織羅紈延軀
似纖約遺視若回瀾瑤裝映層綺金服炫雕欒幸有同佳
好西仕服秦官寶劍垂玉貝汗馬飾金鞍縈場類轉雪逸
控寫騰鸞羅衣夕解帶玉釵暮垂冠

昭君詞

朝發披香殿夕濟汾陰河於茲懷九逝自此斂雙蛾
霑妝疑湛露繞臆狀流波日見奔沙起稍覺轉蓬多
胡風犯肌骨非直傷綺羅銜涕試南望關山鬱嵯峨
始作陽春曲終成苦寒歌唯有三五夜明月暫經過

長歌行

連連舟壑改微微市朝變來功嗣往迹莫武祖升彥局塗
頓遠策留懽恨奔箭拊戚狀驚瀾循休擬回電歲去芳願
違年來苦心薦春兒旣移紅秋林豈停禱一倍茂陵道甯
思柏梁宴長戢兔園情永別金華殿聲徽無惑簡丹青有

餘絢幽籥且未調無使長歌倦

春隲萋綠柳寒墀積皓雪依依往紀盈霏霏來思結思結
纏歲晏曾是掩初節初節曾不掩浮榮逐弦缺弦缺更圓
合浮榮永沈滅色隨夏蓮變態與秋霜耄通迫無異期賢
愚有同絕銜恨豈云忘天道無甄別功名識所職竹帛尋
摧裂生外苟難尋坐爲長歎設

豫章行

燕陵平而遠易河清且駛一見塵波阻臨途引征思雙劍
愛匣同孤鸞悲影異宴言誠易纂清歌信難嗣臥聞夕鍾
急坐閱朝光亟往歡墜壯心來戚滿衰志徂芳無再馥淪

八代詩選 梁一
灰定還熾憂臺尙可忘榮辱亦奚事愧微曠士節徒感鄙
生餌勞哉納辰和地遠託聲寄

江籬生幽渚

澤蘭被荒徑孤芳豈自通幸逢瑤池曠得與金芝叢朝承
紫臺露夕潤綠池風旣美修嫵女復悅繁華童夙昔玉霜
滿旦暮翠條空葉飄儲胥右芳歇露寒東紀化尙盈昃俗
志信積隆財殫交易絕華落愛難終所惜改驩晒豈恨逐
征蓬願回昭陽景持照長門宮

卻出東西門行

一本無
出字

驅馬城西阿遙眺望京闕望極煙原盡地遠山河沒搖裝

非短晨還歌豈明發修服悵邊羈瞻途渺鄉謁馳蓋轉徂
龍回星引奔月樂去哀境滿悲來壯心歇歲華委徂皂年
霜移暮髮晨物久侵尋征思坐淪越清氛掩行夢憂原盪
瀛渤一念起關山千里顧邱窟

青青河邊草

漠漠牀上塵心中憶故人不可憶中夜長歎息歎息
想容儀不言長別離別離稍已久空牀寄杯酒

梁甫吟

龍駕有馳策日御無停陰星籥亟迴變氣化坐盈侵寒光
稍眇眇秋塞日沈沈高窗仄餘火傾河駕騰參飈風折暮

草驚籜實曾林時雲靄空遠淵水結清深奔樞豈易紐殊
庭不可臨懷仁每多意履順孰能禁露情一唯促緩志且
移心哀歌步梁甫歎絕有遺音

白馬篇

白馬紫金鞍停鑣過上蘭寄言狹邪子詎知隴道難赤坂
途三折龍堆路九盤冰生肌裏冷風起骨中寒功名志所
急日暮不遑飧長驅入右地輕舉出樓蘭直去已垂涕甯
可望長安匪期定遠封無羨輕車官唯見恩義重豈覺衣
裳單本持軀命答幸遇身名完

鼓吹曲芳樹

發萼九華隈
開跗寒露側
氤氳非一香
參差多異色
宿昔寒飈舉
摧殘不可識
霜雪交橫至
對之長歎息

夜夜曲

河漢縱且橫
北斗橫復直
星漢空如此
甯知心有憶
孤燈暖不明
寒機曉猶織
零淚向誰道
雞鳴徒歎息

從齊武帝琅邪城講武應詔

九功播姚禪
七德陳武縣
展事昌國圖
息兵由重戰
皇情咨閱典
出車迨辰選
飾徒映寒隰
翻綏臨廣甸
颯沓珮吳戈
參差腰夏箭
風旆舒復卷
雲霞清以轉
輕舞信徘徊
前歌且遙衍
秋原嘶代馬
朱光浮楚練
虹壑寫飛文
巖阿藻

戶部詩選 梁一
餘絢發震嶽靈從揚旌水華變憑高訓武則中天起遐眷
鳳蓋捲洪河珠旗埽長汧方待翠華舉遠適瑤池宴

三日侍林光殿曲水宴應制

宴鎬鏘玉鑿游汾舉仙輶榮光泛彩旄修風動芝蓋淑氣
婉登晨天行聳雲旆帳殿臨春籞帷宮繞芳薈漸席周羽
觴分墀引迴瀨穆穆玄化升濟濟皇階泰將御遺風軫遠

侍瑤臺會

侍宴樂游苑餞呂僧珍應詔

丹浦非樂戰負重切君臨我皇秉至德忘已用堯心愍茲
區宇內魚鳥失飛沈推轂二嶠道揚旆九河陰超乘盡三

屬選士皆百金戎車出細柳餞席遵上林命師誅後服授
律緩前禽函輟方解帶異武稍披襟伐罪芒山曲弔民伊
水潯將陪告成禮待此未抽簪

游鍾山詩應西陽王教五首

靈山紀地德地險資嶽靈終南表秦觀少室邇王城翠鳳
翔淮海衿帶遶神垆北阜何其峻林薄杳蔥青其發地多

奇嶺干雲非一狀合脊共隱天參差互相望鬱律構丹巘

峻嶒起青嶂勢隨九疑高氣與三山壯其卽事旣多美臨

眺殊復奇南瞻儲胥觀西望昆明池山中咸可悅賞逐四

時移春光發隴首秋風生桂枝其多值息心侶結架山之

足八解鳴澗流四禪隱巖曲窈冥終不見蕭條無可欲所

願從之游寸心於此足其四君王挺逸趣羽旆臨崇基白雲

隨玉趾青霞雜桂旗淹留訪五藥顧步佇三芝於焉仰鑣

駕歲暮以爲期其五

登高望春

登高眺京洛街巷紛漠漠迴首望長安城闕鬱盤桓日出

照鈿黛風過動羅紈齊童躡朱履趙女揚翠翰春風搖雜

樹葳蕤綠且丹寶瑟玫瑰柱金羈瑋瑁鞍淹留宿下蔡置

酒過上蘭解眉還復斂方知巧笑難佳期空靡靡含涕未

成歡嘉客不可見因君寄長歎

劉真人東山還

連峯竟無已積翠遠微微寥戾野風急芸黃秋草腓我來
歲云暮於此悵懷歸霜雪方共下甯止露霑衣待余兩歧
秀去去掩柴扉

登元暢樓

危峰帶北阜高頂出南岑中有陵風榭迴望川之陰岸險
每增減湍平互淺深水流本三派臺高乃四臨上有離羣
客客有暮歸心落暉映長浦煥景燭中濤雲生嶺乍黑日
下溪半陰信美非吾土何事不抽簪

酬謝宣城眺臥疾

王喬飛鳧舄東方金馬門從宦非宦侶避世作避喧揆予
發皇鑒短翮屢飛翻晨趨朝建禮晚沐臥郊園賓至下塵
榻憂來命綠尊昔賢侔時雨今守鵲蘭蓀神交疲夢寐路
遠隔思存牽拙謬東汜浮情及西崑顧循良菲薄何以儷
璵璠將隨渤澥去刷羽汎清源

新安江至清淺深見底貽京邑游好

眷言訪舟客茲川信可珍洞徹隨清淺皎鏡無冬春千仞
寫喬樹百丈見游鱗滄浪有時濁清濟涸無津豈若乘斯
去俯映石磷磷紛吾隔囂滓甯假濯衣巾願以潺湲水霑
君纓上塵

循役朱方道路

分繻出帝京升裝奉皇穆洞野屬滄溟聯郊遡河服日映
青邱島塵起邯鄲陸江移林岸微巖深煙岫複歲巖摧磴
草午寒散嶠木榮蔚夕飈卷蹉跎晚雲伏霞志非易從旌
驅信難牧豈慕淄宮梧方辭兔園竹羈心亦何言迷蹤庶
能復

游沈道士館

秦皇御宇宙漢帝恢武功歡娛人事盡情性猶未充銳意
三山上託慕九霄中旣表祈年觀復立望仙宮甯爲心好
道直由意無窮曰余知止足是願不須豐遇可淹留處便

欲息微躬山嶂遠重疊竹樹近蒙籠開襟濯寒水解帶臨
清風所累非物外爲念在玄蹤朋來握石隨賓至駕輕鴻
都令人徑絕惟使雲路通一舉凌倒景無事適華嵩寄言
賞心客歲暮爾來同

古意

挾瑟叢臺下徙倚愛容光佇立日已暮戚戚苦人腸露葵
已堪摘淇水未霑裳錦衾無獨煖羅衣空自香明月雖外
照甯知心內傷

少年新昏爲之詠

山陰柳家女薄言出田墅丰容好姿顏便僻巧言語腰肢

既輒弱衣服亦華楚紅輪映早寒畫扇迎初暑錦履並花
紋繡帶同心苜羅襦金薄厠雲鬢花釵舉我情已鬱紆何
用表崎嶇託意眉間黛申心口上朱莫爭三春價坐喪千
金軀盈尺青銅鏡徑寸合浦珠無因達任意欲寄雙飛鳧
裙開見玉趾衫薄映凝膚羞言趙飛燕笑殺秦羅敷自顧
雖悴薄冠蓋曜城隅高門列駟駕廣路從驅駒何慚鹿盧
劍詎減府中趨還家問鄉里詎堪持作夫

夢見美人

夜聞長歎息知君心有憶果自閨闔來魂交覩容色既薦
巫山枕又奉齊眉食立望復橫陳忽覺非在側那知神傷

者潺湲淚霑臆

直學省愁臥

秋風吹廣陌蕭瑟入南闈愁人掩軒臥高窗時動扉虛館
清陰滿神宇曖微微網蟲垂戶織夕鳥傍欄飛纓珮空爲
忝江海事多違山中有桂樹歲暮可言歸

休沐寄懷

雖云萬重嶺所翫終一邱階墀幸自足安事遠遨遊臨池
清溽暑開幌望高秋園禽與時變蘭根應節抽憑軒舉木
末垂堂對水周紫籜開綠篠白鳥映青疇艾葉彌南浦荷
花遶北樓送日隱曾閣引月入輕幃爨熟寒蔬翦賓來春

蟄浮來往旣云勦光景爲誰留

宿東園

陳王鬪雞道安仁採樵路東郊豈異昔聊可開余步野徑
旣盤紆荒阡亦交互槿籬疎復密荆扉新且故樹頂鳴風
飈草根積霜露驚磨去不息征鳥時相顧茅棟歎愁鴟平
岡走寒兔夕陰帶曾阜長煙引輕素飛光忽我道豈止歲
云暮若蒙西山藥頽齡儻能度

三月三日率爾成章

麗日屬元巳年芳具在斯開花已匝樹流嚶復滿枝洛陽
繁華子長安輕薄兒東出干金堰西臨雁鶩陂游絲應空

轉高楊拂地垂綠幘文照曜紫燕光陸離清晨戲伊水薄
暮宿蘭池象筵鳴寶瑟金瓶泛羽卮甯憶春蠶起日暮桑
欲萎長袂屢已拂彫胡方自炊愛而不可見宿昔減容儀
且當忘情去歎息獨何爲

織女贈牽牛

紅妝與明鏡二物本相親用持施點畫不照離居人往秋
雖一照一照復還塵塵生不復拂蓬首對河津冬夜寒如
此甯遽道陽春初商忽云至暫得奉衣巾施衾已成故每
聚忽如新

應王中丞思遠詠月

月華臨靜夜夜靜滅氛埃方暉竟戶入圓影隙中來高樓
切思婦西園游上才網軒映珠綴應門照綠苔洞房殊未
曉清光信悠哉

和王中書德充詠白雲

白雲自帝鄉氛氲屢迴沒蔽虧崑山樹含吐瑤臺月秋風
西北起飄我過城闕城闕已參差白雲復離離皎潔在天
漢倒影入華池將過丹邱野時至碧林垂九重迎飛燕萬
里送翔螭

詠雪應令

思鳥聚寒蘆蒼雲軫暮色夜雪合且離曉風驚復息嬋娟

入綺窗徘徊驚情極弱桂不勝枝輕飛屢低翼玉山聊可
望瑤池豈難卽

悼亡

去秋三五月今秋還照梁今春蘭蕙草來春復吐芳悲哉
人道異一謝永銷亡簾屏旣毀撤帷席更施張游塵掩虛
座孤帳覆空牀萬事無不盡徒令存者傷

詠石榴

靈園同佳稱幽山有奇質停采久彌鮮含華豈期實長願
微名隱無使孤株出

詠杜若

生存窮絕地豈與世相親
不願逢采擷本欲芳幽人

江淹

銅雀妓

武皇去金閣英威長寂寞
雄劍頓無光雜佩亦銷鑠
秋至明月圓風傷白露落
清夜何湛湛孤燭映蘭幕
撫影愴無從惟懷憂不薄
瑤色行應罷紅芳幾爲樂
徒登歌舞臺終成螻蟻郭

侍始安王石頭

緒官承盛世逢恩侍英王
結劍從深景撫袖逐曾光
暮情鬱無已流望在川陽
平原忽超遠參差見南湘
何如塞北

陰雲鴻盡來翔
孽鏡照愁色徒坐隱憂方山中如未夕無
使桂葉傷

從征虜始安王道中

乘笏從帷幕
仄身豫休明
君子未獲宴
小人亦自營
結軒首涼野
驅馬徼寒城
容裔還鄉權
逶迤去國旌
山氣亘百里
山色與雲平
喬松日夜竦
紅霞旦夕生
徒慙恩厚概
空抱眷施名
仰願光威遠
歲晏返柴荆

從冠軍建平王登廬山香爐峰

廣成愛神鼎
淮南好丹經
此山具鸞鶴
往來盡仙靈
瑤草正翕輦
玉樹信蔥青
絳氣下縈薄
白雲上杳冥
中坐瞰蜿

虹俛伏視流星不尋遐怪極則知耳目驚日落長沙渚曾
陰萬里生藉蘭素多意臨風默含情方學松柏隱羞逐市
井名幸承光誦末伏思託後旌

從建平王游紀南城

恭承此嘉惠末官至南荆斂衽依光采端笏奉仁明再逢
綠草合重見翠雲生江甸知禮富漢渚聞教清君王澹神
思樹羽望楚城年積衣劒滅地遠宮館平錦帳終寂寞綵
瑟祕音英丹沙信難學黃金不可成遷化每如茲安用貴
空名流巖慘中懷凝意方自驚願借若木景長照憂人情

望荆山

奉義至江漢始知楚塞長南關繞桐柏西嶽出魯陽寒郊
無留影秋日縣清光悲風撓重林雲霞肅川漲歲晏君如
何零淚霑衣裳玉桂空掩露金尊坐含霜一聞苦寒奏再
使豔歌傷

步桐臺

客子畏霜雪憂至竟悠哉綺帷生網羅寶刀積塵埃思君
出漢北鞍馬登楚臺歲采合雲光平原秋色來寂聽積空
意凝望信長懷蕙芬自有美光景詎徘徊山中忽緩駕暮
雪將盈階

秋至懷歸

悵然集漢北還望岨山田汙汙百重壑參差萬里山楚關
帶秦隴荆雲冠吳煙草色斂窮水木葉變長川秋至帝子
降客人傷嬋娟試訪淮海使歸路成數千蓬驅未止極旌
心徒自縣若華想無慰憂至定傷年

赤亭渚

吳江泛邱墟饒桂復多楓水夕潮波黑日暮精氣紅路長
寒光盡鳥鳴草木窮瑤水雖未合珠霜竊過中坐識物序
晏臥視歲陰空一傷千里極獨望淮海風遠心何所類雲
邊有征鴻

渡泉嶠出諸山之頂

六代詩選 梁一
三
岑峯蔽日月左右信難哉萬壑共馳驚百谷爭往來鷹隼
既厲翼蛟魚亦曝鰓崩壁迭枕臥嶄石屢盤迴伏波未能
鑿樓船不敢開百年積流水千歲生青苔行行詎半景余
馬以長懷南方天炎火魂兮可歸來

僊陽亭

擘淚訪亭候茲地乃閩城萬古通漢使千載連吳兵瑤澗
負嶄峯銅山鬱縱橫方水堙金艘圓岸伏丹瓊下視雄虹
照俯看綵霞明桂枝空命折煙氣坐自驚劍逕差前檢岷
山慙舊名伊我從霜露僕御復孤征楚客心命絕一願聞
越聲

游黃檗山

長望竟何極，閩雲連越邊。
南州饒奇怪，赤縣多靈仙。
金峯各虧日，銅石共臨天。
陽岫照鸞采，陰谿噴龍泉。
殘杙千代木，膚宰萬古煙。
禽鳴丹壁上，猿嘯青崖閒。
秦皇慕隱淪，漢武願長年。
皆負雄豪威，棄劔爲名山。
況我葵藿志，松朮橫眼前。
所若同遠好，臨風載悠然。

還故園

漢臣泣長沙，楚客悲辰陽。
古今雖不異，茲理亦宜傷。
山中信寂寥，孤景吟空堂。
北地三變露，南簷再逢霜。
竊值寰海闕，側見圭緯昌。
浮雲抱山川，游子御故鄉。
遽發桃花渚，適

宿春風場紅草涵電色綠樹鑠煙光高歌僚關國微歎依
笙篁請學碧靈草終歲自芬芳

陸東海譙山集

杳杳長役思思來使懷濃恆忌光氛度藉蕙望春紅青莎
被海月朱華冒水松輕風暖長嶽雄虹赫遠峯日暮崦嵫
谷參差綵雲重永願白沙渚游衍遂相從丹山有琴瑟不
爲憂傷容

無錫縣歷山集

愁生白露下思起秋風年竊悲杜蘅暮掣涕弔空山落葉
下楚水別鶴噪吳田嵐氣陰不極日色半虧天酒至情蕭

瑟憑尊還惘然一聞清琴奏獻泣方留連況乃客子念直
置絲竹閒

外兵舅夜集

丹林一葉舊碧草從此空煙光拂夜色華舟盪秋風斂意
悵何已極望情思中瑤瀾寂以晏若采能幾終暮心亦誰
寄江皋桂有叢

貽袁常侍

昔我別楚水秋月麗秋天今君客吳阪春色縹春泉幽冀
生碧草沅湘含翠煙鑠鑠霞上景懜懜雲外山涉江竟何
望留滯空採蓮駐情光氣下凝怨琴瑟前珠貝性明潤蘭

玉好芳堅不以宿昔徂懷愧期暮年

古意報袁功曹

從軍出隴北長望陰山雲涇渭各異流恩情於此分故人
贈寶劍鏤以瑤華文一言鳳獨立再說鸞無羣何得晨風
起悠哉凌翠氛黃鵠去千里垂涕爲報君

臥疾怨別劉長史

四時煎日夜玉露催紫榮始懷未及歎春意秋方驚涼草
散螢色衰樹斂蟬聲憑景魂且謚臥堂怨已生承君客江
潭先愁鴻雁鳴吳山饒離袂楚水多別情金堅碧不滅桂
華蘭有英無輟代上朝豈惜鏡中明但見一葉落哀恨方

未平

從蕭驃騎新帝壘

鯢妖毀皇度虹氣岨王猷上宰軫靈略宏威肅廣謀綿嶮
冒戈堞乘嶠架烽樓燕兵歌越水代馬思吳州金笳夜一
遠明月信悠悠雲色被江出煙光帶海浮開襟夾蒼宇拓
遠局溟洲折日承丹谷總駕臨青邱仄待飈霧晏方從畎
壑游

惜晚春應劉祕書

煙景抱空意蘅杜綴幽心心憂望碧葉涵影顧青林風光
多樹色露華翻蕙陰水苔方下蔓石蘿日上尋霞衣已具

帶仙冠不待簪徒爲多委鬱精魄還自臨始獲瓊歌贈一
點重如金山中有雜桂玉漈乃共斟

秋夕納涼奉和荆獄舅

蕭條晚秋景旻雲承景斜虛堂起青靄崦嵫生暮霞空居
寂以歛左右自幽歌騎星謝箕尾濯髮慙陽阿年歇玄圃
壁歲減天津波金簫哀夜長瑤琴怨暮多四時通信黯春
風日夜過楚水徒有蘭憂至竟如何

冬盡難離和邱長史

閒居深悵悵颼寒拂中閨寶札自千里縑書果君題山川
吐幽氣雲景抱長懷茲別亦爲遠潮瀾鬱東西汀皋日慘

色桂閭猿方啼孽意誰侘僚屑涕在心乖杜衡念無沫石
蘭終不睽冀總歲暮駕游衍蒼山蹊

池上酬劉記室

戚戚憂可結結憂視春暮紫荷漸曲池皋蘭覆徑路蔥蒨
亘華堂葢葢雜綺樹爲此久佇立容易光陰度水館次文
羽山葉下暝露懷賞入舊襟悅物覽新賦惜我無雕文報
章慙復素

襍體詩三十首

夫楚謠漢風旣非一骨魏製晉造固亦二體譬猶藍朱
成采雜錯之變靡窮宮商爲音靡曼之態不極故蛾眉

詎同兒而俱動於魄芳草甯其氣而皆悅於魂不其然
與至於世之諸賢各滯所迷莫不論甘而忌辛好丹而
非素豈所謂通方廣恕好遠兼愛者哉乃及公幹仲宣
之論家有曲直安仁士衡之評人立矯抗況復殊於此
者乎又貴遠賤近人之常情重耳輕目俗之恆蔽是以
邯鄲託曲於李奇士季假論於嗣宗斯其效也然五言
之興諒非夔古但關西鄴下既已罕同河外江南頗爲
異法故玄黃經緯之辨金碧浮沈之殊僕以爲亦各具
美兼善而已今作三十首詩數其文體雖不足品藻淵
流庶亦無乖商摧云爾

古離別

遠與君別者乃至雁門關黃雲蔽千里游子何時還送君
如昨日檐前露已團不惜蕙草晚所悲道里寒君在天一
涯妾身長別離願一見顏色不異瓊樹枝兔絲及水萍所
寄終不移

李都尉陵從軍

尊酒送征人踟躕在親宴日暮浮雲滋握手淚如霰悠悠
清川水嘉鮪得所薦而我在萬里結友不相見袖中有短
書願寄雙飛燕

班婕妤詠扇

八
言選
梁一
三
紈扇如團月出自機中素畫作秦王女乘鸞向煙霧彩色
世所重雖新不代故竊悲涼風至吹我玉階樹君子恩未
畢零落在中路

魏文帝曹丕游宴

置酒坐飛閣逍遙臨華池神飈自遠至左右芙蓉披綠竹
夾清水秋蘭被幽崖月出照園中冠佩相追隨客從南楚
來爲我吹參差淵魚猶伏浦聽者未云疲高文一何綺小
儒安足爲肅肅廣殿陰雀聲愁北林眾賓還城邑何用慰
我心

陳思王曹植贈友

君王禮英賢不悅千金璧雙闕指馳道朱宮羅第宅從容
冰井臺清川映華薄涼風盪芳氣碧樹先秋落朝與佳人
期日夕望青閣褰裳摘明珠徙倚拾蕙若眷我二二子辭
義麗金艘延陵輕寶劍季布重然諾處富不忘貧有道在
葵藿

劉文學楨感遇

蒼蒼山中桂團團霜露色霜露一何緊桂枝生自直橘柚
在南國因君爲羽翼謬蒙聖主私託身文墨職丹彩旣已
過敢不自雕飾華月照芳池列坐金殿側微臣固受賜鴻
恩良未測

王侍中粲懷德

伊昔值世亂秣馬辭帝京
旣傷蔓草別方知杖杜情
嶠函湯邱墟冀闕緬縱橫
倚棹泛涇渭日暮山河清
蟋蟀依素野巖風吹枯莖
鸛鷁在幽草客子淚已零
去鄉三十載幸遭天下平
賢主降嘉賞金貂服立纓
侍宴出河曲飛蓋游鄴城
朝露竟幾何忽如水上萍
君子篤恩義柯葉終不傾
福履旣所綏千載垂令名

稽中散康言志

曰余不師訓潛志去世塵
遠想出宏域高步超常倫
靈鳳振羽儀戢景西海濱
朝食琅玕實夕飲玉池津
處順故無

累養德乃入神曠哉宇宙惠雲羅更四陳哲人貴識義大
雅明庇身莊生悟無爲老氏守其真天地皆得一名實久
相賓咸池饗爰居鐘鼓或愁辛柳惠善直道孫登庶知人
寫懷良未遠感贈以書紳

阮步兵籍詠懷

青鳥海上游鸞斯蒿下飛沈浮不相宜羽翼各有歸飄颻
可終極沆瀣安是非朝雲乘變化光曜世所希精衛銜木
石誰能測幽微

張司空華離情

秋月映簾櫳縣光入丹墀佳人撫鳴琴清夜守空帷蘭徑

少行迹玉臺生網絲庭樹發紅彩
閨草含碧滋延佇整綾綺
萬里贈所思願垂湛露惠
信我皎月期

潘黃門岳述哀

青春速天機素秋馳白日
美人歸重泉悽愴無終畢
殯宮已肅清松柏轉蕭瑟
俯仰未能弭尋念非但一撫
衿悼寂寞恍然若有失
明月入綺窗髣髴想蕙質
銷憂非置置早永懷寄夢寐
夢寐復冥冥何由覲爾形
我慙北海術爾無帝女靈
駕言出遠山徘徊泣松銘
雨絕無還雲華滋留英
日月方代序寢興何時平

陸平原機鞞宮

儲后降嘉命恩紀被微身明發眷桑梓永歎懷密親流念
辭南澨銜怨別西津馳道遵淮泗旦夕見梁陳服義追上
列矯迹廁官臣朱黻咸髦士長纓皆俊民契闊承華內綢
繆逾歲年日暮聊總駕逍遙觀洛川徂沒多拱木宿草淩
寒煙游子易感慨躑躅還自憐願言寄三鳥離思非徒然
左記室思詠史

韓公淪賣藥梅生隱市門百年信荏苒何用苦心魂當學
衛霍將建功在河源珪組賢君眄青紫明主恩終軍才始
達賈誼位方尊金張服貂冕許史乘華軒王侯貴片議公
卿重一言太平多歡娛飛蓋東都門顧念張仲蔚蓬蒿滿

中園

張黃門協苦雨

丹霞蔽陽景綠泉涌陰渚水鶴巢層疊山雲潤柱礎有弁
興春節愁霖貫秋序變變涼葉奪戾戾颶風舉高談翫四
時索居慕儔侶青苔日夜黃芳蕤成宿楚歲暮百慮交無
以慰延佇

劉太尉琨傷亂

皇音邁陽九天下橫氛霧秦趙值薄蝕幽并逢虎據伊余
荷寵靈感激徇馳驚雖無六奇術冀與張韓遇甯戚叩角
歌桓公遭乃舉荀息冒險難實以忠貞故空令日月逝愧

無古人度飲馬出城壕北望沙漠路千里何蕭條白日隱
寒樹投袂旣憤懣撫枕懷百慮功名惜未立玄髮已改素
時哉苟有會治亂惟冥數

盧郎中諶感交

大廈須異材廊廟非庸器英俊著世功多士濟斯位眷顧
成綢繆乃與時髦匹媼媁久不虧契闊豈但一逢厄旣已
同處厄非所恤常慕先達概觀古論得失馬服爲趙將疆
場得清謚信陵佩魏印秦兵不敢出慨無握中策徒慙素
絲質羈旅去舊京感遇踰琴瑟自顧非杞梓勉力在無逸
更以畏友朋濫吹乖名實

郭弘農璞游仙

崦山多靈草海濱饒奇石偃蹇尋青雲隱淪駐精魄道人
讀丹經方士鍊玉液朱霞入窗牖曜靈照空隙傲睨摘木
芝陵波採水碧眇然萬里游矯掌望煙客永得安期術豈
愁濛汜迫

孫廷尉綽雜述

太素既已分吹萬著形兆寂動苟有源因謂殤子天道喪
涉千載津梁誰能了思乘扶搖翰卓然凌風矯靜觀尺椹
義理足未嘗少回回秋月明憑軒詠堯老浪迹無蚩斡然
後君了道領略歸一致南山有綺皓交臂久變化傳火乃

薪草疊疊玄思清胸中去機巧物我俱忘懷可以狎鷗鳥
許徵君詢自敘

張子闇內機單生蔽外像一時排冥筮冷然空中賞遣此
弱喪情資神任獨往采藥白雲隈聊以肆所養丹葩曜芳
蕤綠竹陰閒敞茗茗寄意勝不覺凌虛上曲櫺激鮮飈石
室有幽響去去從所欲得失非外獎至哉操斤客重明固
已朗五難旣灑落超迹絕塵網

殷東陽仲文興曠

晨游任所萃悠悠蘊真趣雲天亦遼亮時與賞心遇青松
挺秀萼惠色出喬樹極眺清波深緬映石壁素瑩情無餘

萍拂衣釋塵務求仁既自我立風豈外慕直置忘所宰蕭
散得遺慮

謝僕射混游覽

信矣勞物化憂襟未能整薄言遵郊衢總轡出臺省淒淒
節序高寥寥心悟永時菊曜巖阿雲霞冠秋嶺眷然惜良
辰徘徊踐落景卷舒雖萬緒動復歸有靜曾是迫桑榆歲
暮從所秉舟壑不可攀忘懷寄匠郢

陶徵君潛田居

種苗在東臯苗生滿阡陌雖有荷鋤倦濁酒聊自適日暮
巾柴車路闇光已夕歸人望煙火稚子候檐隙問君亦何

爲百年會有役但願桑麻成蠶月得紡績素心正如此開
徑望三益

謝臨川靈運遊山

江海經邅迴山嶠備盈缺靈境信淹留賞心非徒設平明
登雲峯杳與廬霍絕碧障長周流金潭恆澄澈洞林帶晨
霞石壁映初晰乳竇旣滴瀝丹井復寥次崑嶸轉奇秀岑
峯還相蔽赤玉隱瑤溪雲錦被沙汭夜聞猩猩啼朝見鼉
鼠逝南中氣候煖朱華凌白雪幸游建德鄉觀奇經禹穴
身名竟誰辨圖史終磨滅且泛桂水潮映月游海澨攝生
貴處順將爲智者說

顏特進延之侍宴

太微凝帝宇瑤光正神縣揆日粲書史相都麗聞見列漢
構仙宮開天製寶殿桂棟留夏飈蘭橑停冬霰青林結冥
濛丹巘被蔥蒨山雲備卿霽池卉具靈變重陽集清氛下
輦降玄宴驚望分寰遂矚曠盡都甸氣生川岳陰煙滅淮
海見中坐溢朱組步欄窈瓊弁禮登竚睿情樂闋延皇眄
測恩躋愉逸沿牒懵浮賤榮重餽兼金巡華過盈瑱敢飾
輿人詠方慙綠水薦

謝法曹惠連贈別

昨發赤亭渚今宿浦陽汭方作雲峯異豈伊千里別芳塵

未歇席泫淚猶在袂停艫望極浦弭棹阻風雪風雪旣經
時永夜起懷思汎濫北湖游岩亭南樓期點翰詠新賞開
表瑩所疑摘芳愛氣馥拾纈憐色滋色滋畏沃若人事亦
銷鑠子衿怨忽往谷風誚輕薄共秉延州信無慙仲路諾
靈芝望三秀孤筠情所託所託已殷勤祇足攪懷人今行
嶠岷外銜思至海濱覲子杳未偃款睇在何辰雜佩雖可
贈疏華竟無陳無陳心惰勞旅人豈遊遨幸及風雪霽青
春滿江臯解纜候前侶還望方鬱陶煙景若流遠末響寄
瓊瑤

王徵君微養疾

竊謁瀟湘空翠礧澹無滋寂歷百草晦歛吸鷓雞悲清陰
往來遠月華散前墀鍊藥矚虛幌汎瑟臥遙帷水碧驗未
黷金膏靈詎緇北渚有帝子蕩漾不可期悵然山中暮懷
疴屬此詩

袁太尉淑從駕

宮廟禮哀敬粉邑道嚴立恭潔由明祀肅駕在祈年詔徒
登季月戒鳳藻行川雲屺象漢徙宸網擬星縣朱櫂麗寒
潛金綬映秋山羽衛藹流景綵吹震沈淵辨詩測京國履
籍鑿都鄜毗謠響玉律邑頌被丹絃文軫薄桂海聲教燭
冰天和惠頒上笏恩渥夾下筵幸侍觀洛後豈慕巡河前

服義方無沫展歌殊未宣

謝光祿莊郊游

肅舫出郊際徒樂逗江陰翠山方藹藹青浦正沈沈涼菓
照沙嶼秋榮冒水潯風散松架險雲鬱石道深靜默鏡綿
野四睇亂曾岑氣清知雁引露華識猿音雲袞信解黻煙
駕可辭金始整丹泉術終覲紫芳心行光自容裔無使弱
思侵

鮑參軍照戎行

豪士枉尺璧宵人重恩光徇義非爲利執羈輕去鄉孟冬
郊祀月般氣起嚴霜戎馬粟不煖軍士冰爲漿晨上城皋

陂磧礫皆羊腸寒陰籠白日大谷晦蒼蒼息徒稅征駕倚
劒臨八荒鷓鴣不能飛玄武伏川梁鍛翮由時至感物聊
自傷豎儒守一經未足識行藏

休上人怨別

西北秋風至楚客心悠哉日暮碧雲合佳人殊未來露彩
方泛灩月華始徘徊寶書爲君掩瑤瑟詎能開相思巫山
渚悵望陽雲臺膏爐絕沈燎綺席生塵埃桂水日千里因
之平生懷

效阮公詩十五首

選十四

歲暮懷感傷中夕弄清琴戾戾曙風急團團明月陰孤雲

出北山宿鳥驚東林誰謂人道廣憂慨自相尋甯知霜雪
後獨見松竹心

十年學讀書顏華尙美好不逐世閒人鬪雞東郊道富貴
如浮雲金玉不爲寶一旦鷓鴣鳴嚴霜被勁草志氣多感
失淚下霑懷抱

白露淹庭樹秋風吹羅衣忠信主不合辭意將訴誰獨坐
東軒下雞鳴夜已晞總駕命賓僕遵路起旋歸天命誰能
見人蹤信可疑

飄飄恍惚中是非安所之大道常不驗金火每如斯忼慨
少淑兒便娟多令辭宿昔秉心誓靈明將見期願從丹邱

駕長弄華池滋

陰陽不可知鬼神惟杳冥
暫試武帝兒一見李后靈
同情淪異物有體入無形
賢聖共草昧仁智焉足明
變化未有極恍惚誰能精

若木出海外本自丹水陰
羣帝共上下鸞鳥相追尋
千齡猶旦夕萬世更浮沈
豈與異鄉士瑜瑕論淺深

夏后乘兩龍高會在帝臺
榮光河雒出白雲蒼梧來
侍御多賢聖升降有羣才
四時有變化盛明不徘徊
高陽邈已遠竚立誰語哉

昔余登大梁西南望洪河
時寒原野曠風急霜露多
仲冬

正慘切日月少精華落葉縱橫起飛鳥時相過搔首廣川
陰懷歸思如何常願反初服閒步潁水阿

宵月暉西極女主映東海佳麗多異色芬葩有奇采綺縞
非無情光陰命誰待不與風雨變長具山川在人道則不
然消散隨風改

少年學擊劒從師至幽州燕趙兵馬地唯見古時邱登城
望山水平原獨悠悠寒暑有往來功名安可留

擾擾當塗子毀譽多埃塵朝生輿馬間夕死衢路濱藜藿
應見棄勢位乃爲親華屋爭結綬朱門競彈巾徒羨草木
利不愛金碧身至德所以貴河上有丈人

華樹曜北林芬芳空自宣
秋至白雲起蟪蛄號庭前
中心有所思虛堂獨浩然
安坐詠琴瑟逍遙可永年

假乘試行游北望高山岑
翩翩征鳥翼蕭蕭松柏陰
感時多辛酸覽物更傷心
性命有定理禍福不可禁
唯見雲際鶴江海自追尋

夕雲映西山蟋蟀吟桑梓
零露被百草秋風吹桃李
君子懷苦心感慨不能止
駕言遠行游驅馬清河涘
寒暑更進退金石有終始
光色俯仰間英豔難久恃

清思詩五首

趙后未至麗陰妃非美極
情理儻可論形有焉足識
帝女

在河洲晦映西海側陰陽無定光雜錯千萬色終歲如瓊
草紅華長翕艷

師曠操雅操延子聆奇音玄鶴徒翔舞清角自浮沈明珞
東南逝精絲西北臨白雲瑤池曲止使淚淫淫

秋夜紫蘭生湛湛明月光偃褰靈芝采容裔紫華堂林木
不拂葢淇水甯漸裳倏忽南江陰照曜北海陽從此長來
往萬世無感傷

白露滋金瑟清風蕩玉琴空閨饒遠念虛堂生夜陰茲夕
一何哀明月沒西林世人重時暮道士情亦深願乘青鳥
翼徑出玉山岑

八什詩選 梁一
至德不可傳靈龜不可侶草木還根蒂精靈歸妙理我學
杳冥道誰能測窮已須待九轉成終會長沙市

無錫舅相送銜涕別

心遠路已迴意滿辭未陳曾風漂別蓋北雲竦征人杯酒
憐歲暮志氣非上春若無孤鳥還漚泣何所因

傷內弟劉常侍

金壁白蕙質蘭桂信嘉名丹綵旣騰迹華萼故揚聲伊余
方罷秀歎息向君榮誰疑春光旻何遽秋露輕遠心惜近
路促景怨長情風至衣袖冷况復螿蛄鳴白露沿漢沼明
月空嘆生長悲離短意惻切吟空庭注歛東郊外流涕北

山垆

悼室人十首

選七

佳人永暮矣，隱憂遂歷茲。
寶燭夜無華，金鏡晝恆微。
桐葉生綠水，霧天流碧滋。
蕙弱芳未空，蘭深鳥思時。
湘醺徒有酌，意塞不能持。

適見葉蕭條，已復花菴鬱。
悵裏春風盪，檐前還燕拂。
垂涕視去景，摧心向徂物。
今悲輒流涕，昔歡常飄忽。
幽情一不弭，守歎誰能慰。

駕言出游衍，冀以滌心胸。
復值烟雨散，清陰帶山濃。
素沙而廣岸，雄虹冠尖峰。
山風舞森桂，落日曖圓松。
還結生百

念楚客獨無容

秋至擣羅紈淚滿未能開
風光肅入戶月華爲誰來
結眉向珠網瀝思視青苔
鬢局將成葆帶減不須
摧我心若烟

烟蓋蓋滿中懷

窗塵歲時阻閨蕪日夜深
流黃夕不織甯聞梭杼音
涼靄漂虛坐清香盪空琴
蜻引知寂寥蛾飛測幽陰
乃抱生死悼豈伊離別心

神女色姱麗乃出巫山湄
逶迤羅袂下障日望所思
佳人獨不然戶牖絕錦綦
感此增嬋娟屑屑涕自滋
清光澹且減低意守空帷

二妃麗瀟湘一有乍一無佳人承雲氣無下此幽都當追
帝女迹出入泛靈輿掩映金淵側游豫碧山隅暖然時將
罷臨風還故居

范雲

古意贈王中書

攝宮青瑣闕遙望鳳凰池誰云相去遠脈脈阻光儀岱山
饒靈異沂水富英奇逸翮凌北海搏飛出南皮遭逢聖明
後來棲桐樹枝竹花何莫莫桐葉何離離可栖復可食此
外亦何爲豈知鷦鷯者一粒有餘貲

贈張徐州謾

田家樵採去薄暮方來歸還聞稚子說有客款柴扉
從皆珠玳裘馬悉輕肥軒蓋照墟落傳瑞生光輝疑是徐方
牧既是復疑非思舊昔言有此道今已微物情棄疵賤何
獨顧衡闈恨不具雞黍得與故人揮懷情徒草草淚下空
霏霏寄書雲間雁爲我西北飛

贈俊公道人

秋蓬飄秋甸寒藻泛寒池風條振風響霜葉斷霜枝幸及
清江滿無使明月虧月虧君不來相期竟悠哉

別詩

孤烟起新豐候雁出雲中草低金城霧木下玉門風別君

河初滿思君月屢空折桂衡山北摘蘭沅水東蘭摘心焉
寄桂折意誰通

儆古

寒沙四面平飛雪千里驚風斷陰山樹霧失交河城朝驅
左賢陣夜薄休屠營昔事前軍幕今逐嫖姚兵失道刑旣
重遲留法未輕所賴今天子漢道日休明

之零陵郡次新亭

江干遠樹浮天末孤烟起江天自如合烟樹還相似滄流
未可源高飄去何已

邱遲

侍宴樂游苑送張徐州應詔詩

詰旦閶闔開馳道聞鳳吹輕黃承玉輦細草藉龍騎風遲
山尙響雨息雲猶積巢空初鳥飛荇亂新魚戲實爲北門
重匪親孰爲寄參差別念舉肅穆恩波被小臣信多幸投
生豈酬義

旦發漁浦潭

漁潭霧未開赤亭風已颺權歌發中流鳴鞞響沓障村童
忽相聚野老時一望詭怪石異象嶄絕峯殊狀森森荒樹
齊析析寒沙漲藤垂島易陟崖傾嶼難傍信是永幽棲豈
徒暫清曠坐嘯昔有委卧治今可尙

題琴朴奉柳吳興

邊山此嘉樹搖影出雲垂
清心有素體直幹無曲枝
凡耳非所別君子特見知
不辭去根本造膝仰光儀

任昉

奉和登景陽山

物色感神游升高悵有闕
南望銅駝街北走長楸
埒別澗宛滄溟疏山駕瀛碣
奔鯨吐華浪司南動輕柁
日下重門照雲開九華澈
觀閣隆舊恩奉圖愧前哲

落日泛舟東溪

黝黝桑柘繁芄芄麻麥盛
交柯溪易陰反景澄餘映
吾生

雖有待樂天庶知命不學梁甫吟惟識滄浪詠田荒我有
役秩滿余謝病

濟浙江

昧旦乘輕風江潮忽來往或與歸波送乍逐翻流上近岸
無暇目遠峰更興想綠樹縣宿根丹崖傾久壤

疑闕

贈郭桐廬出谿口見候余既未至郭仍進村維舟久之郭

生方至

朝發富春渚蓄意忍相思涿令行春返冠蓋溢川坻望久
方來萃悲懽不自持滄江路窮此湍險方自茲疊嶂易成
響重以夜蛾悲客心幸自弭中道遇心期親好自斯絕孤

游從此辭

答何徵君

散誕羈勒外拘束名教裏得性千乘同山林亦朝市勿以
耕蠶貴空笑易農士宿昔仰高山超然絕塵軌傾壺已等
樂命管亦齊喜無爲歎獨游若終方同止

贈徐徵君

促生悲永路早交傷晚別自我隔容徽於焉徂歲月情非
山河阻意似江湖悅東臯有儒素杳與榮名絕曾是違賞
心曷用箴余缺眇焉追平生塵書廢不閱信此伊能已懷
抱豈暫輟何以表相思貞松擅嚴節

答劉孝綽

閔水旣成瀾藏舟遂移壑彼美洛陽子投我懷秋作久敬
類誠言吹噓似嘲謔兼稱夏雲盡復陳秋樹索詎慰耄嗟
人徒深老夫託直史兼褒貶轄司專疾惡九折多美疹匪
報庶良藥子其崇鋒穎春耕勵秋穫

別蕭諮議

離燭有窮暉別念無終緒歧言未及申離目已先舉揆景
巫衡阿臨風長楸浦浮雲難嗣音徘徊悵誰與儻有關外
驛聊訪狎鷗侶

出郡傳舍哭范僕射一首

平生禮數絕式瞻在國楨一朝萬化盡猶我故人情待時
屬興運王佐俟民英結歡三十載生死一交情攜手遁衰
孽接景事休明運阻衡言革時泰玉階平濬沖得茂彥夫
子值狂生伊人有涇渭非余揚濁清將乖不忍別欲以遺
離情不忍一辰意千齡萬恨生已矣平生事詠歌盈篋笥
兼復相嘲謔常與虛舟值何時見范侯還敘平生意與子
別幾辰經塗不盈旬弗覩朱顏改徒想平生人甯知安歌
日非君撤瑟辰已矣余何歎輟春哀國均

王僧孺

侍宴詩二首

麗景屬春餘，清陰澄夏首。交林隱修逕，迴流影遙阜。徒帷
輓輕筠，移鑿拂高柳。去矣勞茂績，勉哉報嘉誘。小臣良不
才，涓塵愧所守。何用勝雕斲，譬木良如朽。

迴輿避暑宮，下輦迎風館。散漫輕煙轉，霏微商雲散。蔓草
亘巖垂，高枝起天半。回風稍驚水，落光漸斜岸。妙舞駐行
雲，清歌入曾漢。睟顏暢有懌，德音良已粲。

中川長望

長川杳難卽，四望四無極。安流甯可值，憤風方未息。危帆
渡中縣，孤光巖下昞。岸際樹難辨，雲中鳥易識。莫限東復
西，誰知迂且直。故鄉相思者，當春愛顏色。獨寫千行淚，誰

同萬里憶

至牛渚憶魏少英

楓林暖似畫沙岸淨如埽空籠望縣石回斜見危島綠草
間游蜂青葢集輕鷗徘徊洞初月浸淫瀆春潦非願歲物
華徒用風光好

爲何庫部舊姬擬薜蘿之句

出戶望蘭薰
寒簾正逢君
斂容纔一訪
新知詎可聞
新人含笑近
故人含淚隱
妾意在寒松
君心逐朝槿

何生姬人有怨

寒樹棲羈雌
月映風復吹
逐臣與棄妾
零落心可知
寶琴

徒七絃蘭燈空百枝
顰容不足效啼妝
拭復垂同衾成楚
越異國非此離

月夜詠陳南康
新有所納

二八人如花三五月
如鏡開簾一種色
當戶兩相映重價
出秦韓高名入燕鄭
十城屢請易千金
幾爭聘君意自能
專妾心本無競

與司馬治書同聞鄰婦夜織

洞房風已激長廊
月復清藹藹夜庭
廣飄飄曉帳輕雜聞
百蟲思偏傷一鳥聲
鳥聲長不息妾心復
何極猶恐君無衣
夜夜當窗織

落日登高

憑高且一望目極不能捨
東北指青門西南見白社
軫軫河梁上紛紛渭橋下
爭利亦爭名驅車復驅馬
甯訪蓬蒿人誰憐寂寞者

贈顧倉曹

洛陽十二門樓闕似西崑
曖曖采鳳下相望隔畫垣
畫垣向阿閣棲鳳復棲鴛
五曹均趨奏六尙等便煩
朝爐何馥馥夜錦有餘溫
日中驅上駟驥首遍京苑
晨趨魏公子夕宿韓王孫
夙昔今何在生平棄不論
譬如菴菴草心謝葉空存
誰復三承睫獨念九飛魂

張率

遠期

遠期終不歸
節物坐將變
白露愴單衣
秋風息團扇
誰能久別離
他鄉且異縣
浮雲蔽重山
相望何時見
寄言遠期者
空閨淚如霰

柳惲

江南曲

汀洲採白蘋
日暖江南春
洞庭有歸客
瀟湘逢故人
故人何不返
春花復應晚
不道新知樂
祇言行路遠

度關山

少長倡家女出入燕南垂
惟持德自美本以容見知
舊聞關山遠何事總金羈
妾心日已亂秋風鳴細枝

贈吳均三首

寒雲晦滄洲奔潮溢南浦
相思白露亭永望秋風渚
心知別路長誰謂若燕楚
關候日遼絕如何附行旅
願作歸飛鳥飄然自輕舉

遠遊濟伊洛秣馬度清漳
邯鄲饒美女豔色含春芳
鼓瑟未成曲踏屣復翱翔
我本遊客子情愛在淮陽
新知誰不樂念舊苦人腸

夕宿飛狐關晨登磧礫坂
形爲戎馬倦思逐征旗遠
邊城

秋霞來寒鄉春風晚始信
隴雪輕漸覺寒雲卷徭役命所
當念子加餐飯

雜詩

雲輕暮色轉草綠晨芳歸
山墟罷寒晦園澤閏朝暉春心
多感動睹物情復悲自君之去矣
蘭堂罷鳴機徒知游宦
是不念別離非

七夕穿針

代馬秋不歸緇紈無復緒
迎寒理衣縫映月抽纖縷的皜
愁睇光連娟思眉聚清露
下羅衣秋風吹玉柱流陰稍已
多餘光欲誰與

擣衣詩五首

孤衾引思緒，獨枕愴憂端。
深庭秋草綠，高門白露寒。
思君起清夜，促柱奏幽蘭。
不怨飛蓬苦，徒傷蕙草殘。
行役滯風波，游人淹不歸。
亭皋木葉下，隴首秋雲飛。
寒園夕鳥集，思牖草蟲悲。
嗟矣當春服，安見禦冬衣。
鶴鳴勞永歎，採菘傷時暮。
念君方遠遊，望妾理紈素。
秋風吹綠潭，明月懸高樹。
佳人飭淨容，招搖從所務。

步櫺杳不極，離堂肅已扃。
軒高夕杵散，氣爽夜砧鳴。
瑤華隨步響，幽蘭逐袂生。
踟躕理金翠，容與納宵清。

泛豔迴烟綵，淵旋龜鶴文。
淒淒合歡袖，冉冉蘭麝芬。
不怨

六代詩選 卷一 梁一
杼軸苦所悲千里分垂泣送行李傾首遲歸雲

庾肩吾

賦得橫吹曲長安道

桂宮連複道黃山開廣路遠聽平陵鐘遙識新豐樹合殿
生光彩離宮起烟霧日落歌吹還塵飛車馬度

侍宴餞張孝總應令

層臺臨迴漲耿耿晴烟上欲送分符人翻似河隄望寒雲
暗積水秋雨蒙重嶂別念動神襟華文切離貺慙無寡和
曲空陪郢中唱

吳均

雉子班

可憐雉子班羣飛集野甸文章始陸離意氣已驚狷幽并
遊俠子直心亦如箭生死報君恩誰能孤恩眄

與柳惲相贈答六首

黃鵬飛上苑綠芷出汀洲日映昆明水春生鳩鵲樓飄颻
白花舞瀾漫紫萍流書織迴文錦無因寄隴頭思君甚瓊
樹不見方離憂

鳴鞭適大阿聯翩渡漳河燕姬及趙女挾瑟夜驚過織腰
曳廣袖半額畫長蛾客本倦游者箕帚在江沱故人不可
棄新知空復何

離居苦無樂回慕心悽悽要途訪趙使聞君仕執珪杜蘅
色已發菖蒲葉未齊羃歷蠶餌重差池燕吐泥願逐東風
去飄蕩至遼西

白日隱城樓勁風掃寒木離析隔東西執手異涼燠相思
咽不言洞房清且肅歲去甚流烟年來如轉軸別鶴千里
飛孤雌夜未宿

間房肅已靖落月有餘暉寒蟲隱壁思秋蛾繞燭飛絕雲
斷更合離禽去復歸佳人今何在迢遞江之沂一爲別鶴
弄千里淚沾衣

秋雲靜晚天寒夜方綿綿聞君吹急管相思雜采蓮別離

未幾日滿月三成
弦蹠疊黃河浪嘶
唱隴頭絃寄君薜
蕪葉插著叢臺邊

答柳惲

清晨發隴西日暮飛狐谷
秋月照層嶺寒風掃高木
霧露夜侵衣關山曉催軸
君去欲何之參差間原陸
一見終無緣懷悲空滿目

答蕭新浦

僕本二陵徒英豪多久要角
觝良家兒期門惡年少身紆
文二組手擎尺一詔問子行
何去高帆艤江干今夜杯酒
別明朝江水邊莓莓看細雨
漠漠視濃烟颯灑入銅翦低

昂五會船欲知故人者江南其采蓮悒然心不樂跨馬出
城壕觀濠看白鷺望草見青袍青袍行中把蔽草覆平野
公子不垂堂紛紛故交者肘懸辟邪印屋矐鴛鴦瓦翩翩
流水車蕭蕭曳練馬是時君別我青莎沒馬蹏連連文蠶
璽鷺鷥伺朝雞今日予懷友積恨滿東西

酬周參軍

日暮憂人起倚戶悵無懽水傳洞庭遠風送雁門寒江南
霜雪重相如衣服單沈雲隱高樹細雨滅層巒且當對尊
酒朱絃永夜彈

贈杜容成

一燕海上來一燕高堂息一朝相逢遇依然舊相識問余
來何遲山川幾紆直答言海路長風駛飛無力昔別縫羅
衣春風初入帷今來夏欲晚桑扈薄樹飛

酬別江主簿屯騎

有客告將離贈言重蘭蕙泛舟當泛濟結交當結桂濟水
有清源桂樹多芳根毛公與朱亥俱在信陵門趙瑟鳳凰
杜吳醪金罍尊我有北山志留連爲報恩夫君皆逸翮搏
景復凌鷲白雲間海樹秋日暗平原寒蟲鳴趯趯落葉飛
翻翻何用贈分首自有北堂萱

贈別新林

僕本幽并兒抱劔事邊陲風亂青絲絡霧染黃金羈天子
既無賞公卿竟不知去去歸去來還傾鸚鵡杯氣爲故交
絕心爲新知開但令寸心是何須銅雀臺

送柳吳興竹亭集

平原不可望波瀾千里直夕魚汀下戲暮雨檐中息白雲
時去來青峰復負側躑躅牛羊下晦昧崦嵫色王孫猶未
歸且聽西光匿

邊城將

聞君報一餐遠送出平野玉標丹霞劔金絡豔光馬高旗
入漢飛長鞭歷地寫曙星海中出曉月山頭下歲晏坐論

功自有思臣者

春怨

四時如湍水飛奔競迴復夜烏響嚶嚶朝花照煜煜厭見
花成子多看筍成竹萬里斷音書十載異棲宿積愁落芳
髻長啼壞美目君去往榆關妾留住函谷唯對昔邪房如
愧蜘蛛屋獨喚響相酬還持影自逐象牀易氍毹羅衣變
單複幾過度風霜猶能保煢獨

贈周散騎興嗣

子雲好飲酒家在成都縣製賦已百篇彈琴復千轉敬通
不富豪相如本貧賤共作失職人包山一相見

贈王桂陽

松生數寸時遂爲草所沒未見籠雲心誰知負霜骨弱幹
可摧殘纖莖易陵忽何當數千尺爲君覆明月

閨怨

春草可攬結妾心正斷絕綠鬢愁中改紅顏嗁裏滅非獨
淚成珠亦見珠成血願爲飛鵲鏡翩翩照離別

何遜

登石頭城

關城乃形勢地險差非一馬領逐紆回犬牙傍隆宰百雉
極衿帶億庾兼量出至理歸無爲善守竟何恤眺聽窮耳

目遠近備幽悉擾擾見行人輝輝視落日連檣入迴浦飛
蓋交長術天莫遠山青潮去遙沙出薄宦慙師表屬辭慙
愈疾願乘殼棘牛還隱蒙龍室

望廨前水竹答崔錄事

蕭蕭藜竹映澹澹平湖淨葉倒漣漪文水漾檀欒影相思
不會面相望空延頸遠天去浮雲長墟斜落景幽疴與歲
積賞心隨事屏鄉念一遭迴白髮生俄頃

酬范記室雲

林密戶稍陰草滋階欲暗風光縈上輕日色花中亂相思
不獨懽佇立空爲歎清談莫共理緜文徒可玩高唱子自

輕繼音子可憚

日夕望江山贈魚司馬

湓城帶湓水湓水縈如帶日夕望高城耿耿青雲外城中
多宴賞絲竹常緜會管聲已流悅弦聲復淒切歌黛慘如
愁舞腰凝欲絕仲秋黃葉下長風正騷屑早雁出雲歸故
燕辭檐別晝悲在異縣夜寢還洛汭洛汭何悠悠起望西
南樓的的帆向浦團團月映洲誰能一羽化輕舉逐飛浮
入西塞示南府同僚

露清曉風冷天曙江光爽薄雲巖際出初月波中上黯黯
連嶂陰騷騷急沫響回查亟礙浪羣飛爭戲廣伊余本羈

客重睽復心賞望鄉雖一路懷歸成二想在昔愛名山自
知懽獨往情游乃落魄得性隨怡養年事以蹉跎生平任
浩蕩方還讓夷路誰知羨魚網

送韋司馬別

送別臨曲渚征人慕前侶離言雖欲緜離思終無緒憫憫
分手畢蕭蕭行帆舉舉帆越中流望別上高樓予起南枝
怨子結北風愁邈邈山蔽日洶洶浪隱舟隱舟邈已遠徘徊
迴落日晚歸衢並駕奔別館空筵卷想子斂眉去知子銜
淚返銜淚心依依薄莫行人稀曖曖入塘港蓬門已掩扉
簾中看月影竹裏見螢飛螢飛不息獨愁空轉側北窗

倒長簾南鄰夜聞織棄置勿復陳重陳長歎息

別沈助教

可憐玉匣劒復此飛鳧未覺愛生憎忽見雙成隻一朝
別笑語萬事成疇昔道迢迢若波瀾人生異金石願君深自
愛其念悲無益

與蘇九德別

宿昔癯顏色咫尺思言偃何況杳來期各在天一面峙嶮
暫舉酒倏忽不相見春草似青袍秋月如團扇三五出重
雲當知我憶君萋萋若被逕懷抱不相聞

入東經諸暨縣下浙江作

疲身不自量溫腹無恆擬未能守封植何能固廉恥一經
可人言三冬徒戲爾虛信蒼蒼色未究冥冥理得彼旣宜
然失之良有以常言厭四壁自覺輕千里日夕聊望遠山
川空信美歸飛天際沒雲霧江邊起安邑乏主人臨邛多
客子鄉鄉自風俗處處皆城市所見無故人含意終何已
擬青青河邊草轉韻體爲人作其人識節工歌

春蘭日應好折花望遠道秋夜苦復長抱枕向空牀吹臺
下促節不言於此別歌筵掩團扇何時一相見弦絕猶依
軫葉落纔下枝卽此雖云別方我未成離

學古

輦洛上東門薄莫川流側渾渾車馬道行人不相識日夕
棲鳥遠浮雲起新色寸心空延佇對面何由卽飛輪儻易
去易去因風力

臨行公車

擾擾排曙扉鱗鱗驅早駕禁門儼猶閉嚴城方警夜道勝
多增榮拙薄終難化以茲畎澮質重與滄溟舍纚舟去濁
河揆景辭清灞平生多意緒懷抱皆徂謝念此將如何撫
心獨悲咤

塘邊見古冢

行路一孤墳路成墳欲毀空疑年代積不知陵谷徙幾逢

秋葉黃驟見春流瀾金蠶不可織玉樹何時紫陌上驅馳
人笑歌自侈靡今日非明日所念誰憐此

蕭子範

夏夜獨坐

節序值徂炎茲宵在三伏憑軒佇涼氣中筵倦煩燠寂寞
對空窗清疎臨夜竹蟲音亂階草螢光繞庭木簾月度斜
輝風光起餘馥一傷年志罷長嗟逝波速

王筠

早出巡行矚望山海

王生臨廣隰潘子望洪河同軫懷歸思俱興年逝歌日余

異二子承睫淚滂沱剖符瀛海外結綬層山阿因心留惻
憫恕已息煩苛繕築循時隙興動藉民和高門惟壯麗修
雉亦駢羅層樓亦攀陟複道亦經過昧旦清音上風氣入
織蘿雲起垂天翼水動連山波奔濤延瀾汗積翠遠嵯峨
鄉關屢迴曲還顧杳蹉跎曾微肅肅羽望路空如何
北寺寅上人房望遠岫翫前池

安期逐長往交甫稱高讓遠迹入滄溟輕舉馳昆閬良由
心獨善兼且情由放豈若尋幽棲卽目窮清曠激水周堂
下屯雲塞檐向閒牖聽奔濤開窗延疊嶂前階復虛沿瀾
迤成洲漲雨點散圓文風生起斜浪游鱗互灑潏羣飛皆

唼吮蓮葉蔓田田
菱花動搖漾浮光
耀庭廡流芳襲帷帳
匡坐足忘懷詎思江海上

秋夜

露華初泥泥桂枝行
棟棟般氣下重軒
輕陰滿四屋別寵
增修夜遠征悲獨
宿愁牽翠羽眉淚
滿橫波目長門絕
往來含情空杼柚

游望

落日照紅妝挾瑟
當窗牖甯復歌靡
蕪惟聞歎楊柳結
好在同心離別由
眾口徒設露葵羹
誰酌蘭英酒會日
杳無期舜華安得
久

代牽牛答織女

新知與生別由來儻相值如何寸心中一宵懷兩事歡娛
未繾綣倏忽成離異終日遙相望祗益生愁思猶想今春
悲尙有故年淚忽遇長河轉獨喜涼飈至奔精翊鳳軫織
阿警龍轡

劉孝綽

三日侍安成王曲水宴

匯澤良孔殷分區屏中縣躡跨兼流采襟喉邇封甸吾王
奄艷畢析珪承羽傳不資魯俗移何待齊風變東山富游
士北土無遺彥一言白璧輕片善黃金賤餘辰屬上巳清

被追前諺持此陽瀨游復展城隅宴芳洲
亘千里遠近風光扇方歡厚德重誰言薄游倦

侍宴餞庾於陵應詔

皇心眷將遠帳餞靈芝側是日青春獻林塘多秀色芳卉
疑綸組嘉樹似雕飾游絲綴鶯領光風送綺翼下輦朝旣
盈留宴景將側高辨競談端奇文爭筆力伊臣獨無伎何
用奉吹息

侍宴餞張惠紹應詔

滄池誠自廣蓬山一何峻麗景花上鮮油雲葉裏潤風度
餘芳滿鳥集新條振餞言班俊造光私獎輜去徒然謬反

八竹言遺
梁一
隅何以窺重仍

太子湫落日望水

川平落日迴落照滿川漲復此淪波地派別引沮漳耿耿
流長脈熠熠動微光寒鳥逐查漾飢鶉拂浪翔臨泛自多
美況乃還故鄉榜人夜理檝權女闈成妝欲待春江曙爭
塗向洛陽

還渡浙江

季秋弦望後輕寒朝夕殊商人泣紈扇客子夢羅襦憂來
自難遣況復阻川隅日暮愁陰合繞樹噪寒鳥濛漠江煙
上蒼茫沙嶼蕪解纜辭東越接軸驚西徂懸帆似馳驥飛

棹若驚鳧言歸游俠窟方從冠蓋攜

江津寄劉之遴

與子如黃鵠將別復徘徊經過一柱觀出入三休臺共摘
雲氣藻同舉霞紋杯佳人每曉游禁門恆晚開欲寄一言
別高駕何由來

酬陸長史倕

王粲始一別猶且歎風雲況余屢之遠與子亟離羣如何
持此念復爲今日分分悲宛如昨弦望殊揮霍行舟雖不
見行程猶可度度君路應遠期寄新詩返相望且相思勞
朝復勞晚薄暮闈人進果得承芳信殷勤覽妙書留連披

雅韻洌洲財賦總慈山行旅鎮已切臨睨情遽動思歸引
歸與不可卽前途方未極覽諷欲諉誚研尋還慨息來喻
勛雕金比質非所任虛薄無時用徘徊守故林屏居青門
外結宇灞城陰竹庭已南映池牖復東臨喬柯貫檐上垂
條拂戶陰條開風暫入葉合影還沈帷屏溽早露階霑擾
昏禽衡門謝車馬賓席簡衣簪雖愧陽陵曲甯無流水琴
蕭條聊屬和寂寞少知音平生竟何託懷抱共君深一朝
四美廢方見百憂侵曰余濫官守因之泝廬久水接淺原
陰山帶荆門右從容少職事疲病疎僚友命駕獨尋幽淹
留宿廬阜廬阜擅高名峇峇陵太清舒雲類紫府標霞同

赤城北上輪難進東封馬易驚未若茲山險車騎息逢迎
山橫路似絕徑側樹如傾蒙龍乍一啟磔碗無暫平倚巖
忽回望援蘿遂上征乍觀秦帝石復憩周王城交峰隱玉
雷對澗距金楹風傳鳳臺瑄雲渡洛濱笙紫書時不至丹
爐且未成無因追羽翮及爾宴蓬瀛蓬瀛不可託悵然反
城郭時過馬鳴院偶憩鹿園閣旣異人世勞聊比化城樂
影塔圖花樹經臺總香藥月殿曜朱旛風輪和寶鐸園榭
卽重嶺階基仍巨壑朝猿響蕙棟夜水聲帷薄餘景鶩登
臨方宵盡談諠談諠有名僧慧義似傳燈遠師教逾闡生
公道復弘小乘非汲引法善報招能積迷頓已悟爲懽得

未曾爲懽誠已往坐臥猶懷想況復心所積茲地多諧賞
惜哉無輕軸更泛輪湖上可思不可見離念空盈蕩賈生
傅南國平子相東阿優游匡贊罷縱橫辭賦多方才幸同
貫無令絕詠歌幽谷雖云阻煩君計吏過

古意

燕趙多佳麗白日照紅妝蕩子十年別羅衣雙帶長春樓
怨難守玉階空自傷復此歸飛燕銜泥繞出房差池入綺
幙上下傍雕梁故居猶可念故人安可忘相思昏望絕宿
昔夢容光魂交忽在御轉側定他鄉徒然顧枕席誰與同
衣袞空使蘭膏夜炯炯對繁霜

望月有所思
秋月始纖纖微光垂步簷
瞳瞳入牀簾
髣髴鑿窗簾
螢
隱光息簾蟲映光纖玉羊
東北上金虎西南長門隔清
夜高堂夢容色如何當此時
懷情滿胸臆

劉孝威

公無渡河

請公無渡河
河廣風威厲
檣偃落金烏
舟傾沒犀柁
紺蓋
空巖祠白馬
徒生祭銜石
傷寡心
朔城掩媚袂
劒飛猶共
水魂沈理俱
逝君爲川后
臣妾作江妃
娣

驄馬驅

六代詩選 梁一
翩翩驄馬驅橫行復斜趣先救遼城圍後拂燕山霧風傷
易水湄日入隴西樹未得報君恩聯翩終不住

筮篥謠

結交在相得骨肉何必親甘言無忠實世薄多蘇秦從風
暫靡草富貴上昇天不見山顛樹摧扞下爲薪豈甘井中
泥上出作埃塵

郟縣遇見人織率爾寄婦

天姬含怨情織素起秋聲度梭環玉動踏躡佩珠鳴經稀
疑杼盪緯斷恨絲輕葡萄始欲罷鴛鴦猶未成雲棟共徘徊
紗窗相向開窗疏眉語度紗輕眼笑來籠籠隔淺紗的

的見妝華鏤玉同心蕩雜寶連枝花紅衫向後結金簪臨
鬢斜機頂挂流蘇機旁垂結珠青絲引伏兔黃金繞鹿盧
豔彩裙邊出芳脂口上渝百城交問遺五馬其峙踞直爲
閨中人守故不要新寢嘒漬花枕覺淚涇羅巾獨眠眞自
難重衾猶覺寒逾憶凝脂煖彌想橫陳歡行驅金絡騎歸
就城南端城南稍有期想子亦勞思羅衣久應罷花釵堪
更治新妝莫點黛余還自畫眉

徐勉

采菱曲

相攜及嘉月采菱渡北渚微風吹櫂歌日莫相容與采采

不能歸望望方延伫儻逢遺佩人預以心相許

徐悝

白馬篇

妍蹄飾鏤鞍飛鞚度河干少年本上郡敖游入露寒劍琢
荆山玉彈把隨珠丸聞有邊烽急飛候至長安然諾竊自
許捐軀諒不難占兵出細柳轉戰向樓蘭雄名盛李霍壯
氣勇彭韓能令石飲羽復使髮衝冠要功非汗馬報效乃
鋒端日沒塞雲起風悲胡地寒西征馘小月北去腦烏桓
歸報明天子燕然今復刊

古意酬到長史漑登琅邪城

甘泉警烽候上谷抵樓蘭此江稱豁險茲山復鬱盤表裏
窮形勝襟帶盡巖巒修篁壯下屬危樓峻上千登陣起遐
望回首見長安金溝朝灞澹甬道人鴛鸞鮮車驚華轂汗
馬躍銀鞍少年負壯氣耿介立衝冠懷紀燕山石思開正
谷丸豈如灞上戲羞取路傍觀寄言封侯者數奇良可歎

劉峻

登郁洲山望海

滄溟聯霄岫曾嶺鬱嶺崩下盤鹽海底上轉靈鳥翼溟沔
非可辨鴻溶信難測輕塵久弭飛驚浪終不息雲錦曜石
嶼羅綾文水色

自江州還入石頭詩

鼓枻浮大川，延睇洛城觀。
洛城何鬱鬱，杳與雲霄半。
前望蒼龍門，斜瞻白鶴館。
槐垂御溝道，柳綴金隄岸。
迅馬晨風趨，輕輿流水散。
高歌梁塵下，絃瑟荆禽亂。
我思江海游，曾無朝市玩。
忽寄靈臺宿，空軫及關歎。
仲子入南楚，伯鸞出東漢。
何能棲樹枝，取斃王孫彈。

始居山營室

自昔厭諠囂，執志好棲息。
嘯歌棄城市，歸來事耕織。
鑿戶闕嶠嶢，開軒望嶰峒。
激水檐前溜，修竹堂陰植。
香風鳴紫鷺，高梧巢綠翼。
泉脈洞杳杳，流波下不極。
髣髴玉山隈，想

象瑤池側夜誦神仙記且吸雲霞色將馭六龍輿行從三
島食誰與金門士拊心論胸臆

陸倕

以詩代書別後寄贈京邑寮友

余本水鄉士閉門江海隅時逢世道泰蹇足步高衢名成
宦雖立效微功日疎入仕乘肥馬出守擁高車關門游昔
吏遷亭有故書江派資賢牧宗英出建旛不勞王布鼓無
賴露田車弼政非責實求名已課虛長卿病猶在修齡疾
未祛詎知亭長肉甯挂府丞魚不能未能止內訟慚諸已
僂俛從王事纚舟出淮泗朋故遠追尋暝宿清江陰明且

一分手翻飛各異林歸舟隨岸曲猶聞歌棹音行者日趨
遠誰見別離心夕次泐洲岸明登慈姥岑水流多迴復余
歸良未尋江關寒事早夜露傷秋草心屬姑蘇臺目送邯
鄲道葭葦日蒼蒼親知慎早涼劉兄消渴病休攝戒無良
殷弟癩眩疾行止避風霜劉侯有餘冷宜餌陟釐方伏子
多風咳門冬幸易將率更愛雅體體弱思自強吏曹勉玉
潤諷議最金相比部多暇日奚用肆龍章建德何爲者無
墮無人鄉記室朋從暇露蛄附行商議曹坐朝罷尺板嗣
徽芳雙棲成獨宿俱飛忽異翔眷言思親友沈思結中腸
追惟疇昔時朝府多歡暇薄暮塵埃靜飛蓋遙相返李郭

或同舟潘夏時方駕娛談終美景敷文永清夜促膝豈異
人戚戚皆朋婭今者一乖離漼然心事差山川望猶近便
似隔天涯玉躬子加護昭質余未虧八行思自勉一札望
來儀

荀濟

贈陰梁州

副尉西域返伏波南海還坎壈多構難鬱怏少騰遷孰云
功未立甯是契不全直爲逢迎寡良由聽受偏若人本高
絕芬馥邁蘭荃驅車趨折阪匡坐酌貪泉洗幘豈虛唱席
皮良信然羣醉嫉孤醒眾媿恐獨妍龍旗翻委鬱鷁軸更

迴遼鯤勢終橫海鵬力會翀天昔余遇知己一面深千祀

紆人

當作仁

重結韞辱德逾過市詩酒悅風雲琴歌賞桃李

淹留漢水曲契闊渝川浹結綬惟貢公推名實鮑子徒然
懷伏劔終無報國士高懷不可忘劔意何能已已作金蘭
契何言雲雨別咄嗟改容鬢俄頃彌年歲海曲窮地表江
源表天際雲泥已殊路暄涼詎同節柳絮亟如絲梅花屢
成雪月落桂陰遠風起萱條結鶴舞想低昂鳴弦寢清切
聞君戍靈關瓜時猶未還數汎明月沼頻游向日彎金碧
應髣髴輪鏡幾登攀復承西歸後將兵出湖口經過道路
長往來日月久玉體何容歇金漿故應有陽臺可燕私章

華堪置酒旣彈趙女瑟復擊秦人缶缶瑟多奇調秦趙饒

妹妙得意在雙眸傾城猶一笑伯喈恩實早十杜

永詳

天終

少歿等盛姬傷存同魏車照君子篤久要宿昔盛賓僚依
依集鱗羽眷眷共枝條一朝限歧路萬里異波潮容儀雖
眇眇寐想尙昭昭新人不相識故人詎相憶杳閒山川
迢迢阻音息各附青雲遠詎假排虛力風月接歡宴酒醴
承顏色安知慕儔者潏浚涕霑軾僕本不平人悲愁眉亦
顰年來空自老歲去不知春未能全體命於中欲問津五
噫如適越十上似游秦肌膚積霜露膂力倦風塵烏裘日
日故白髮朝朝新人生感意氣相知無富貴懷趙實廉頗

思燕唯樂毅大選咆咻士廣募嫖姚尉暎月比刀環瞻星
看劔氣郢路一迢遠長楸幾獻欻渤澥水尙寬崦嵫日猶
未丈夫志四海兒女多辭費待余濟濁河從君宿清渭

虞羲

送友人上湘

濡足送征人褰裳臨水路共盈一尊酒對之愁日莫漢廣
雖容舸風悲未可渡佳期難再得但願論心故沅水日生
波芳洲行墜露共知邱壑改同無金石固

詠霍將軍北伐

擁旌爲漢將汗馬出長城長城地勢險萬里與雲平涼秋

八九月虜騎入幽并飛狐白日晚瀚海愁雲生羽書時斷
絕刁斗晝夜驚乘墉揮寶劒蔽日引高旂雲屯七萃士魚
麗六郡兵胡笳關下思羌笛隴頭鳴骨都先自誓日逐次
亾精玉門罷斥堠甲第始修營位登萬庾積功立百行成
天長地自久人道有虧盈未窮激楚樂已見高臺傾當令
麟閣上千載有雄名

江洪

詠荷

澤陂有微草能花復能實碧葉喜翻風紅英宜照日移居
玉池上託根庶非失如何霜露交應與飛蓬匹

高爽

詠鏡

初上鳳凰墀此鏡照蛾眉言照長相守不照長相思虛心
會不采貞明空自欺無言故此物更復對新期

費昶

有所思

上林烏欲棲長門日行莫所思鬱不見空想丹墀步簾動
意君來雷聲似車度北方佳麗子窈窕能迴顧夫君自迷
惑非爲妾心妬

長門怨

向夕千愁起自悔何嗟及愁思且歸牀羅襦方掩泣絳樹
搖風輒黃鳥弄聲急金屋貯嬌時不言君不入
華觀省中夜聞城外擣衣

閨闔下重關丹墀吐明月秋氣城中冷秋砧城外發浮聲
繞雀臺飄響度龍闕宛轉何藏摧當從上路來藏摧意未
已定自乘軒裏乘軒盡世家佳麗似朝霞圓瑤耳上照方
繡領閒斜衣薰百和屑鬢插九枝花昨莫庭槐落今朝羅
綺薄拂席卷鴛鴦開縵舒龜鶴金波正容與玉步依砧杵
紅裊往還縈素挽參差舉徒聞不得見獨夜空愁佇獨夜
何窮極懷之在心惻階垂玉衡露庭舞相風翼瀝滴流星

輝粲爛長河色三冬誠足用五日無糧食楊雲已寂寥今
君復弦直

朱异

還東田宅贈朋離

應生背芒說石子河陽文雖有敖游美終非沮溺羣
已余今卜築兼以隔囂紛池入東陂水窗引北巖雲
槿籬集田鷺茅欄帶野芬原隰何邈迤山澤共氛氲
蒼蒼松樹合耿耿樵路分朝興候崖晚莫坐極林曛
憑高眺虹蜺臨下瞰耕耘豈直娛衰莫兼得慰殷勤
懷勞猶未弭獨有望夫君

王樞

至烏林村見采桑者因有贈

遙見提筐下
翩妍實端妙
將去復回身
欲語先爲笑
閨中初別離
不許覓新知
空結茱萸帶
敢報木蘭枝

湯僧濟

渌井得金釵

昔有倡家女
摘花露井邊
摘花還自插
照井還自憐
窺窺終不罷
笑笑自成妍
寶釵于此落
從來非一年
翠羽成泥去
金色尙如鮮
此人今不在此
物今空傳

徐悱妻劉氏

荅外

花庭麗景斜
蘭牖輕風度
落日更新妝
開簾對春樹
鳴鵲
葉中舞戲蝶
花閒驚調琴
本要歡心愁不成
趣良會誠非
遠佳期今不遇
欲知幽怨多
春闈深且莫

八代詩選第十一上

因言部

陳隋一

八代詩選十一下

五言第九

長沙湘潭王闔運撰

後主陳叔寶

關山月二首

戍邊歲月久恆悲望舒耀城遙接暈高澗風連影搖寒光
帶岫徙冷色含山峭看時使人憶爲似嬌娥照

上巳宴麗暉殿各賦一字十韻

芳景滿闌牕暄光生遠阜更以登臨趣還勝被禊酒日照
源上桃風搖城外柳斷雲仍合霧輕霞時映牖遠樹帶山
高嬌鶯含響偶一峯遙落日數花飛映綬度鳥或遛檐飄

絲屨薄藪言志遞爲樂置觴方薦壽文學且迺筵羅綺令
陳後干戈幸勿用寧須勞馬首

畫堂良夜履長在節歌管賦詩迺筵命酒十韻成篇
季冬初陽始寒氣尙蕭颯原葉或委低岫雲時吐欲雕樹
乍疏迴遠峯自重杳雲興四山霾風動萬籟答肅肅凝霜
下峩峩層冰合複殿可以娛於茲多延納迢迢百尺觀杳
杳三休閣前後訓導屏左右文衛匝進退簪纓移縱橫壯
思襍幸矣天地泰當無范睢拉

徐陵

爲羊兖州家人答餉鏡

信來贈寶鏡亭亭似團月鏡久自踰明人久情愈歇取鏡
掛空臺於今莫復開不見孤鸞鳥香魂何處來

張正見

應龍篇

應龍未起時乃在淵底藏非雲足不蹈舉則冲天翔譬彼
野蘭草幽居常獨香清風播四遠萬里望芬芳隱居可頤
志自見焉得彰

江總

游攝山栖霞寺

并序

禎明元年太歲丁未四月十九日癸亥入攝山展慧布

法師憶謝靈運集還故山入石壁中尋曇隆道人詩
一首十一韻今此拙作仍學康樂之體

霖霖時雨霽清和孟夏肇栖宿綠野中登頓丹霞杪敬仰
高人德抗志塵物表三空豁已悟萬有一何小始從情所
寄冥期諒不少荷衣步林泉麥氣涼昏曉乘風面泠泠候
月臨皎皎烟崖憩古石雲路排征鳥披逕憐森沈攀條惜
杳裊平生忘是非朽謝豈矜矯五淨自此涉六塵庶無擾

釋洪偃

登吳昇平亭

蕭蕭物候晚肅肅天望清旅人聊策杖登高蕩客情川原

多舊迹墟里或新名宿烟浮始旦朝日照初晴獨游乏徒
侶徐步寡逢迎信矣非吾託賞心何易并

北魏節閔帝拓拔恭

詩一首

朱門久可患紫極非情翫顛覆立可待一年三易換時運
正如此惟有脩真觀

孝莊帝拓拔子攸

臨終詩

懼去生道促憂來死路長懷恨出國門含悲入鬼鄉隧門
一時閉幽庭豈復光思鳥吟青松哀風吹白楊昔來聞死

苦何言身自當

韓延之

贈中尉李彪

賈生謫長沙董儒詣臨江愧無若人跡忽尋兩賢蹤追音
渠閣游策驚廁羣龍如何情願奪飄然獨遠從痛哭去舊
國銜淚屈新邦哀哉無援民嗷然失侶鴻彼蒼不我聞干
里告志同

常景

讚四君

長卿有豔才直致不羣性鬱若春煙舉皎如秋月映游梁

雖好仁仕漢常稱病清貞非我事窮達委天命

右司馬相如

王子挺秀質逸氣干青雲明珠既絕俗白鵠信警羣才世
苟不合遇否途自分空枉碧雞命徒獻金馬文

右王褒

嚴君情沈靜立志明霜雪味道綜微言端著演妙說才屈
羅仲口位結李強舌素尙邁金貞清標陵玉徹

右嚴君平

蜀江導清流揚子挹餘休含光絕後彥覃思邈前脩世輕
久不賞玄談物無求當途謝權寵置酒得閒游

右楊雄

溫子昇

從駕幸金墉城

茲城實佳麗飛甍自相竝膠葛擁行風岩巖闕流景御溝
屬清洛馳道通丹屏湛淡水成文參差樹交影長門久已
閉離宮一何靜細草綠玉階高枝蔭桐井微微夕渚暗肅
肅暮風冷神行揚翠旗天臨肅清警伊臣從下列逢恩信
多幸康衢雖已泰弱力將安騁

詠花蝶

素蝶向林飛紅花逐風散花蝶俱不息紅素還相亂芬芬

其襲手歲蕤從可玩不慰行客心遽動離居歎

北齊邢邵

七夕

盈盈河水側朝朝長歎息不恡漸衰苦波流詎可測秋期
忽云至停梭理容色束衿未解帶迴鑾已沾軾不見眼中
人誰堪機上織願逐青鳥去慙因希羽翼

庾信

對酒歌

春水望桃花春洲藉芳杜琴從綠珠借酒就文君取牽馬
向渭橋日曝山頭脯山簡接離倒王戎如意舞箏鳴金谷

八
竹
詞
選
陳
至
隋
三
園笛韻平陽塢人生一百年歡笑惟三五何處覓錢刀求
爲洛陽賈

夜聽搗衣

秋夜搗衣聲飛度長門城今夜長門月應如晝日明小鬟
宜粟瑱圓腰運織成秋砧調急節亂杵變新聲石燥砧逾
響桐虛杵絕鳴鳴石出華陰虛桐採鳳林北堂細腰杵南
店女郎砧擊節無勞鼓調聲不用琴並結連枝縷雙穿長
命針倡樓驚別怨征客動愁心同心竹葉椀雙去雙來滿
裙裾不柰長衫袖偏宜短龍文鏤剪刀鳳翼纏管風流
響和韻哀怨聲悽斷新聲繞夜風嬌轉滿空中應聞長樂

殿判徹昭陽宮花鬢醉眼纈龍子細文紅溼摺通夕露吹
衣一夜風玉階風轉急長城雪應闌新綬始欲縫細錦行
須纂聲煩廣陵散杵急漁陽摻新月動金波秋雲泛濫過
誰憐征戍客今夜在交河栩陽離別賦臨江愁思歌復令
悲此曲紅顏餘幾多

隋煬帝楊廣

飲馬長城窟行示從征羣臣

肅肅秋風起悠悠行萬里萬里何所行橫漠築長城豈台
小子智先聖之所營樹茲萬世策安此億兆生詎敢憚焦
思高枕於上京北河秉武節千里捲戎旌山川互出沒原

野窮超忽撻金止行陣鳴鼓興士卒千乘萬騎動飲馬長
城窟秋昏塞外雲霧暗關山月綠巖驛馬上乘空烽火發
借問長城候單于入朝謁濁氣靜天山晨光照高闕釋兵
仍振旅要荒事方舉飲至告言旋功歸清廟前

白馬篇

白馬金貝裝橫行遼水傍問是誰家子宿衛羽林郎文犀
六屬鎧寶劍七星光山虛弓響徹地迴角聲長宛河推勇
氣隴蜀擅威強輪臺受降虜高闕翦名王射熊入飛觀校
獵下長楊英名欺衛霍智策蔑平良島夷時失禮卉服犯
邊疆徵兵集薊北輕騎出漁陽進軍隨日暈挑戰逐星芒

陣移龍勢動營開虎翼張衝冠入死地攘臂越金湯塵飛
戰鼓急風交征旆揚轉鬪平華地追奔埽鬼方本持身許
國況復武功彰會令千載後流譽滿旂常

冬至乾陽殿受朝

北陸玄冬盛南至晷漏長端拱朝萬國守文繼百王至德
慙日用治道愧時康新邑建嵩岳雙闕臨洛陽圭景正八
表道路均四方碧空霜華淨朱庭皎日光纓珮旣濟濟鐘
鼓何鏗鏗文戟翊高殿采旻分脩廊元首之明哲股肱貴
惟良舟楫行有寄庶此王化昌

早渡淮

平淮旣淼淼曉霧復霏霏淮甸未分色泱泱共晨暉晴霞
轉孤嶼錦帆出長圻潮魚時躍浪沙禽鳴欲飛會待高秋
晚愁因逝水歸

捨舟登陸示慧日道場玉清玄壇德眾一首

天淨宿雲卷日舉長川旦颺洒林花落逶迤風柳散孤鶴
近追羣啼鶯遠相喚蓮舟水處盡畫輪途始半江滙各自
遙東西並興歎已熏禪慧力復藉金丹捍有異三川游會
非四門觀於焉履妙道超然登彼岸

顏之推

古意二首

十五好詩書二十彈冠仕楚王賜顏色出入章華裏作賦
凌屈原讀書誇左史數從明月讌或侍朝雲祀登山摘紫
芝泛江採綠芷歌舞未終曲風塵暗天起吳師破九龍秦
兵割千里狐兔穴宗廟霜露沾朝市璧入邯鄲宮劒去襄
城水未獲狗陵墓獨生良足恥憫憫思舊都惻惻懷君子
白髮闕明鏡憂傷沒余齒

寶珠出東國美玉產南荆隋侯矐我色卞氏飛吾聲已加
明稱物復飾夜光名驪龍旦夕駭白虹朝暮生華彩燭兼
乘價值詎連城常悲黃雀起每畏靈蛟迎干刃安可捨一
毀難復營昔爲時所重今爲時所輕願與濁泥會思將垢

石并歸眞川岳下抱潤潛其榮

楊素

山齋獨坐贈薛內史二首

居山四望阻風雲竟朝夕深溪橫古樹空巖臥幽石日出
遠岫明鳥散空林寂蘭庭動幽氣竹室生虛白落花入戶
飛細草當堦積桂酒徒盈樽故人不在席日暮山之幽臨

風望羽客

巖壑澄清景清巖壑深白雲飛暮色綠水激清音澗戶
散餘彩山窗凝宿陰花草共榮映樹石相陵臨獨坐對陳
榻無客有鳴琴寂寂幽山裏誰知無悶心

贈薛內史

耿耿不能寐京洛久離羣
橫琴還獨坐停杯遂待君
待君春草歇獨坐秋風發
朝朝唯落花夜夜空明月
明月徒流光落花空自芳
別離望南浦相思在漢陽
漢陽隔隴岑南浦達桂林
山川雖未遠無由得寄音

贈薛播州十四首

在昔天地閉品物屬屯蒙
和平替王道哀怨結人風
麟傷世已季龍戰道將窮
亂海飛羣水貫日引長虹
干戈異革命揖讓非至公

兩河定寶鼎八水域神州
函關絕無路京洛化爲邱
漳滏

爾連沼涇渭余別流生郊滿戎馬涉路起風牛班荆疑莫
遇贈縞竟無由

五緯連珠聚千載濁河清金亡潛虎質閨盡自蛙聲聖期
伊旦暮天祿啟炎精霧生三日重星飛五老輕禋宗答上
帝改物創羣生

道昏雖已朗政故猶未新剗舟洄水濟結網大川濱出游
迎釣叟入夢訪幽人植林雖各樹開榮豈異春相逢一時
泰其幸百年身

有帛賁邱園生芻自幽谷塵芳金馬路瀾清鳳池澳零露
既垂光清風復流穆傾蓋如舊知彈冠豈新沐利心金各

斷芬言蘭共馥

自余歷端揆緝熙恧時彥及爾陪帷握出納先天睠高調
發清音縟藻流餘絢或如彼金玉歲暮無凋變余松待爾
心爾筠留我箭

荏苒積歲時契闊同游處闐闐既趨朝承明還宴語上林
陪羽獵甘泉侍清曙迎風含暑氣飛雨淒寒序相顧惜光
陰留情共延佇

滔滔彼江漢實爲南國紀作牧求明德若人應斯美高臥
未褰帷飛聲已千里還望白雲天日暮秋風起峴山君儻
游淚落應無已

漢陰政已成嶺表人猶蠹彈冠比方新還珠摠如故楚人
結去思越俗歌來暮陽鳥尙歸飛別鶴還迴顧君見南枝
巢應思北風路

北風吹故林秋聲不可聽雁飛窮海寒鶴唳霜皋淨含毫
心未傳聞音路猶負唯有孤城月徘徊獨臨映弔影余自
憐安知我疲病

養病願歸閒居榮在知足栖遲茂陵下優游滄海曲古人
情可見今人遵路躅荒居接野窮心物俱非俗桂樹芳叢
生山幽竟何欲

所欲棲一枝稟分豐諸己園樹避鳴蟬山梁遇雌雉野陰

冒叢灌幽氣含蘭芷悲哉暮秋別春草復萋矣鳴琴久不
聞屬聽空流水

秋水魚游日春樹鳥鳴時濠梁莫其往幽谷有相思千里
悲無駕一見杳難期山河散瓊蘂庭樹下丹滋物華不相
待遲暮有餘悲

銜悲向南浦寒色黯沈沈風起洞庭險煙生雲夢深獨飛
時慕侶寡和乍孤音木落悲時暮時暮感離心離心多苦
調詎假雍門琴

何妥

樂部曹觀樂

東海餘風大陶唐遺思深何如觀徧舞奏鼓聞撻金清管
調絲竹朱絃韻雅琴八行陳樹羽六德審知音至道兼韶
濩充庭總鞅任高天度流火落日廣城陰百神諧景福萬
國仰君臨大樂非鐘鼓且用戒民心

薛道衡

昭君辭

我本良家子充選入椒庭不蒙女史進更失畫師情蛾眉
非本質蟬鬢改真形專由妾命薄誤使君恩輕啼霑渭橋
路歎別長安城夜依寒草宿朝逐轉蓬征卻望關山迴前
瞻沙漠平胡風帶秋月嘶馬雜笳聲毛裘易羅綺氍帳代

金屏自知蓮臉歇羞看菱鏡明釵落終應棄髻解不須縈
何用單于重詎假闕氏名馱馱聊彊食筒酒未能傾心隨
故鄉斷愁逐塞雲生漢宮如有意爲視旄頭星

敬酬楊僕射山齋獨坐

相望山河近相思朝夕勞龍門竹箭急華岳蓮花高岳高
嶂重疊鳥道風煙接遙原樹若薺遠水舟如葉葉舟旦旦
浮驚波夜夜流露寒洲渚白月冷函關秋秋夜清風發彈
琴卽鑑月雖非莊舄歌吟詠常思越

虞世基

秋日贈王中舍

秦關望吳苑渭涘去江濱天漢星躔絕山川地角分百年
變朝市千里異風雲雙鴛難可贈別鶴不相聞忽值從游
士玳簪光素履歡言悅鄭郊雪泣悲燕市契闊論談笑殷
勤訪生死思君在一方無由同四美尺素乃云披投瓊慰
久離雲開縹錦散霞照綠緹披相思歎河廣相望阻天垂
贈言方杜若握手代萱枝伊昔風期早金蘭信爲寶去來
金馬門留連鬪雞道鷺嶺訪三禪商山追四皓勝地俱游
息披文遞論討虛薄忝官聯喬木遂同遷濯纓升博望闕
步入崇賢高軒照流水長劒聳秋蓮南風忽不競東海遂
成田喧喧狹斜路隱隱平陵樹鳳闕曖西臨星橋耿南注

五方多異俗四海皆行路士衡嗟苦辛德璉傷流寓鞏洛
重行行寓目盡傷情太行臨北絳函谷拒西京雀書圖久
滅龍文鼎遂輕凌雲餘構盡濛汜曲池傾徘徊殊未極惆
悵空雲纓伊川忽會面留連展言宴東西一背飛翻然成
異縣哀哉人道促痛矣嗟埋玉嵇生顧影琴裴子飄風燭
摧茲激水意頓此浮雲足棄置勿重陳難終唯此曲漢陽
趙元淑薛縣雍門周清文寧解病妙曲反增愁翳翳神逾
伏懍懍歲方邁雙嶠飛暗雨八水凍寒流蘭枯芳草歇槐
古憶前秋江干不可望徒此歎離憂

孫萬壽

遠戍江南寄京邑親友

陳至隋

賈誼長沙國屈平湘水濱江南瘴癘地從來多逐臣
粵余非巧宦少小拙謀身欲飛無假翼思鳴不值晨
如何載筆士翻作負戈人飄颻如木偶棄置同芻狗
失路乃西浮非狂亦東走晚歲出函關方春度京口
石城臨虎據天津望牛斗牛斗盛妖氛梟獍已成羣
郗超初入幕王粲始從軍裏糧楚山際披甲吳江濱
吳江一浩蕩楚山何糾紛驚波上濺日喬木下臨雲
繫越恆資辯喻蜀幾飛文魯連唯救患吾彥不爭勳
羈游歲月久歸思常搔首非關不樹萱豈爲無杯酒
數載辭鄉縣三秋別親友壯志後風雪衰鬢先

蒲柳心緒亂如絲空懷疇昔時昔時游帝里弱歲逢知己
旅食南館中飛蓋西園裏河閒本好書東平唯愛士英辯
接天人清言洞名理鳳池時寓直麟閣常游止勝地盛賓
僚麗景相攜招舟汎昆明水騎指涓津橋袂除臨灞岸供
帳出東郊宜城醞始熟陽翟曲新調繞樹烏啼夜離麥雉
飛朝細塵梁下落長袖掌中嬌懽娛三樂至懷抱百憂銷
夢想猶如昨尋思久寂寥一朝牽世網萬里逐波潮迴輪
常自轉懸旆不堪搖登高視衿帶鄉關白雲外迴首望孤
城愁人益不平華亭宵鶴唳幽谷早鶯鳴斷絕心難續恫
恍魂屢驚羣紀通家好鄒魯故鄉情若值南飛雁時能訪

死生

王胄

酬陸常侍

相知四十年別離萬餘里君留五湖曲余去三河涘寒松
 君後凋溺灰余僅死何言西北雲復覲東南美深交不忘
 故飛觴登宴喜贈藻發中情奇音邁流徵追惟中歲日於
 斯同憩止思之宛如昨倏焉逾二紀疇昔多朋好一旦埋
 蒿里無人莫已知有慟傷知己把臂還相泣巋然吾與子
 霑襟行自念哀哉亦已矣吾歸在漆園著書試詞理勞息
 乃殊致存亡寧異軌大路不能遵咄哉情可鄙

釋曇遷

緇素知友祖道新林去留哀感賦詩一首

平生本胡越閩吳各異津聯翩一傾蓋便作法城親清談
解煩累愁眉始得伸今朝忽分手恨失眼中人子向徑河
道慧業日當新我住邦江側終爲松下塵沈浮從此隔無
復更有因此別終天別迸淚忽霑巾

大義公主

書屏風

盛衰等朝露世道若浮萍榮華實難守池臺終自平富貴
今何在空事寫丹青杯酒恒無樂弦歌詎有聲余本皇家

子飄流入虜廷一朝覩成敗懷抱忽縱橫古來其如此非
我獨申名惟有明君曲偏傷遠嫁情

丁六娘

十索四首

裙裁孔雀羅紅綠相參對映似蛟龍錦分明奇可愛麤細
君自知從郎索衣帶

爲性愛風光偏憎良夜促曼眼腕中嬌相看無厭足懽情
不耐眠從郎索花燭

君言花勝人人今去花近寄語落花風莫吹花落盡欲作
勝花妝從郎索紅粉

二八好容顏非意得相關
逢桑欲採折尋枝倒懶攀
欲呈織織手從郎索指環

同前二首

含嬌不自轉送眼勞相望
無那關情伴共入同心帳
欲防人眼多從郎索錦障

蘭房下翠帷蓮房舒鴛錦
懽情宜早暢密意須同寢
欲共作纏綿從郎索花枕